

Empat usahawan dinobat  
Ikon Agro Selangor

2

Sambutan Deepavali  
negeri Sabtu ini

2

Insentif RM1,000 untuk  
wanita bekerja

5

RM2.9 juta manfaat  
3,000 peniaga

8

# selangorkini

PERCUMA

PP 19570/07/2020 (035196)

EDISI 2 - 8 NOVEMBER 2023

www.selangorkini.my

## RM10 juta teruskan jualan murah

Program Jualan Ehsan Rahmah ditumpu kepada musim perayaan dengan menambah produk antaranya sayuran, buah-buahan dan makanan sejuk beku termasuk udang yang memanfaatkan penduduk berpendapatan rendah

MUKA 4

### Baucar RM200 untuk 22,000 penduduk

Seperti perayaan utama lain, Kerajaan Negeri peruntuk dana RM4.4 juta sempena Deepavali bagi meringankan beban masyarakat kurang berkemampuan untuk sediakan persiapan sambutan tersebut

MUKA 2



Dato' Menteri Besar Dato'Seri Amirudin Shari menyampaikan sumbangan Kerajaan Negeri kepada Setiausaha Bahagian Asia Barat Kementerian Luar Negeri Datuk Zahairi Baharim (tiga, kiri) di bangunan pentadbiran negeri pada 27 Oktober 2023. Foto FIKRI YUSOF ►BERITA MUKA 2

## pancawarna

### Tragedi Palestin, 12 juta melarat

Sidang Zionis pada 1897 bawa derita ke tanah para nabi



10

### Cahaya suluh penggiat seni tempatan

Pengecualian duti rangsang kreativiti, semarakkan industri hiburan



9

### Pokok keladi ubah hidup asnaf

Bekas tukang kebun sekolah jana pendapatan hasil jual tanaman hiasan



15

## Tingkat kebajikan untuk semua

**GOMBAK** - Kerajaan Negeri mengulangi komitmen untuk memastikan tiada mana-mana pihak terpinggir daripada menerima kebajikan dan pembangunan.

Dato' Menteri Besar Dato' Seri Amirudin Shari juga menegaskan pentadbiran negeri sentiasa memastikan semua lapisan masyarakat menerima layanan adil mengikut perlembagaan.

Justeru, beliau berharap orang ramai tidak mudah termakan hasutan pihak tidak bertanggungjawab yang sengaja mahu menimbulkan sengketa dan perpecahan kaum.

"Jangan mudah termakan api perkuman untuk pecah belahan kita. Kalau kita rasa curiga dan timbulkan sengketa, akhirnya kita tidak maju dan mudah dipengaruhi pihak luar," katanya pada 29 Oktober.

## Kemuka petisyen DUN Gombak Setia

**SHAH ALAM** - Hanya satu petisyen pilihan raya dikemukakan bagi membatal keputusan kerusi yang dimenangi Perikatan Nasional dalam pilihan raya negeri Selangor pada Ogos.

Pengerusi Pakatan Harapan (HARAPAN) negeri berkata ia melibatkan kerusi Dewan Undangan Negeri (DUN) Gombak Setia yang menyaksikan calon Barisan Nasional tewas dengan majoriti 58 undi.

Dato' Seri Amirudin Shari menambah tiga lagi kerusi yang sebelum ini dicadang untuk membuat petisyen sama iaitu Dengkil, Sungai Kandis dan Taman Medan tidak diteruskan.

"Saya difahamkan pihak guaman Parti Keadilan Rakyat berasa kes itu (tiga kerusi tersebut) tidak mahu diteruskan," katanya seperti lapor Bernama pada 27 Oktober.

Sebelum ini, HARAPAN dan BN mempertimbang untuk memfail petisyen pilihan raya empat kerusi DUN yang mencatat majoriti rendah.

**IMBAS DI SINI**  
akbar digital minggu lepas

## 22,000 terima baucar perayaan

**SHAH ALAM** - Sebanyak 22,000 baucar Jom Shopping diagih kepada keluarga berpendapatan rendah sempena perayaan Deepavali yang disambut minggu depan, kata Dato' Menteri Besar.

Dato' Seri Amirudin Shari menjelaskan peruntukan RM4.4 juta disediakan bagi membantu pengikut Hindu di negeri ini untuk membuat persiapan perayaan berkenaan.

"Tradisi Kerajaan Negeri sempena perayaan utama di Selangor, baucar Jom

Shopping RM200 akan diedar kepada mereka yang memerlukan agar kemeriahian perayaan disambut bersama.

"Inisiatif ini bukti tekad kita yang bukan sekadar memajukan negeri malah mengangkat nilai manusawi dan kebajikan," katanya di Facebook pada 1 November.

Jom Shopping Raya diperkenal dengan menyasar golongan berpendapatan rendah sebagai inisiatif jangka panjang bagi membela kebajikan dan

kesejahteraan rakyat.

Selain Deepavali, inisiatif bawah Iltizam Selangor Penyayang (ISP) turut diberi kepada keluarga kurang berkecukupan ketika untuk menyambut Aidilfitri dan Tahun Baharu Cina.

Belanjawan tahun ini memperuntuk RM16.48 juta bagi memanfaatkan 82,400 penerima selepas nilai baucar itu dinaik daripada RM100 kepada RM200 berikutan situasi ekonomi dan keperluan rakyat.

## Galak anak syarikat negeri menyumbang

# RM1 juta bantu rakyat Palestin

Oleh NORRASYIDAH ARSHAD

**SHAH ALAM** - Kerajaan Negeri menyekarkan sumbangan RM1 juta kepada Akaun Amanah Kemanusiaan Rakyat Palestin (AAKRP) bagi mengurangkan kesengsaraan rakyat negara itu.

Dato' Menteri Besar menyerahkan cek cura kepada Setiausaha bahagian Asia Barat Kementerian Luar Negeri Datuk Zahairi Baharim di bangunan pentadbiran negeri (SUK) di sini.

"Sumbangan ini disalur ke tabung tersebut dan realitinya sudah sampai untuk bantu mangsa kekejaman di Gaza yang semakin meningkat," kata Dato' Seri Amirudin Shari pada 27 Oktober.

Tabung AAKRP diwujudkan susulan konflik keganasan dan pertempuran di Semenanjung Gaza. Kerajaan persekutuan menyumbang RM10 juta dana awal tabung itu.

Amirudin turut menggalakkan anak syarikat pentadbiran negeri untuk bersama-sama menyalur sumbangan

membantu warga Palestin.

"Pada 2021, Kerajaan Negeri sudah keluarkan dana untuk membeli ambulans dan peralatan kesihatan dan masih beroperasi.

"Jadi kita akan buat tindakan susulan melibatkan anak syarikat untuk tambah keperluan terutama perubatan," katanya.

Pada 19 Oktober, Amirudin mewakili rakyat Selangor mengutuk keras keganasan rejim Israel terhadap Palestin dan bersolidariti dengan semua pihak bagi menegakkan keamanan di situ.

## Keraian Deepavali negeri Sabtu ini

**SHAH ALAM** - Majlis sambutan perayaan Deepavali peringkat negeri dijadual berlangsung di pekarangan tempat letak kereta Dataran Klang@Padang Chetty pada 4 November.

EXCO Sumber Manusia V Papparaidu berkata rumah terbuka mulai 7 petang hingga 11 malam bakal dihadiri Dato' Menteri Besar Dato' Seri Amirudin Shari.

Katanya, sambutan bertema 'bersatu kita teguh, bercerai kita roboh' yang dijangka dihadiri antara 2,000 hingga

5,000 orang menyaji persembahan tradisional dan serahan bantuan.

"Perayaan ini disambut dengan penuh semangat muhibah kerana ia memupuk persaudaraan dan keharmonian lebih kukuh dalam kalangan semua kumpulan etnik," katanya pada 30 Oktober.

Papparaidu menegaskan orang ramai perlu sentiasa berusaha memupuk



semangat murni dan kerjasama antara kaum kerana nilai tersebut menjadi tonggak kekuatan sebuah negeri.

"Apabila tiba perayaan sebuah kaum, seluruh masyarakat tanpa mengira agama berkongsi hari penuh istimewa dalam suasana meriah dan berwarna-warni, inilah uniknya negara kita," katanya.

## Nobat empat usahawan Ikon Agro

**SHAH ALAM** - Empat usahawan kategori ternakan dan tanaman dinobatkan sebagai Ikon Agro Selangor 2022 bagi edisi ketiga.

Mereka ialah penternak ikan keli dan talapia Mohd Hafiz Nordin, Faridah Khalid (lebah kelulut), Kamarul Iqbal Ismail (melon) serta Mohd Noorhardy Mohd NoorZain (nanas).

Mereka menerima hadiah wang tunai dan bantuan peralatan bernilai RM10,000 serta trofi yang disampaikan EXCO pertanian di Bangunan Perbadanan Kemajuan Pertanian Selangor (PKPS).

Ir Izham Hashim menjelaskan pen-

calonan program dianjur sejak 2020 itu berlangsung sengit berikutan semua usahawan berpotensi dan mempunyai perniagaan besar.

"Semua calon ini dinilai dalam pelbagai sudut termasuk jenis perniagaan, penggunaan teknologi internet kebendaan (IoT) dan pemodenan. Kali ini semua calon hebat dalam kategori masing-masing."

"Kita harap apabila diangkat sebagai ikon mereka akan membantu membimbing usahawan dalam bidang sama memulakan perniagaan," katanya pada 30 Oktober.

Tambahnya, Kerajaan Negeri turut memantau perniagaan usahawan-usahawan yang bergelar ikon agro edisi terdahulu supaya perniagaan diusahakan terus berjaya.

Program Ikon Agro Selangor bertujuan menjadikan negeri sebagai pusat bekalan makanan selain menggalakkan lebih ramai berkecimpung dalam industri berkaitan.

Edisi ketiga menerima 23 penyertaan selepas permohonan ditutup pada 18 Januari lalu. Lima kategori dipertanding iaitu penternakan, akuakultur, tanaman, industri asas tani dan agro pelancongan.



**BINCANG...** Duli Yang Maha Mulia (DYMM) Sultan Selangor Sultan Sharafuddin Idris Shah Alhaj berkenan menerima menghadap DYMM Sultan Johor Sultan Ibrahim ibni Almarhum Sultan Iskandar di Istana Selangor, Kuala Lumpur pada 28 Oktober. Keberangkatan Sultan Ibrahim bagi menjunjung kasih selepas proses pemilihan Yang di-Pertuan Agong ke-17. Foto Facebook Selangor Royal Office

Lindungi kanak-kanak, warga emas

# Pelan sokongan wanita bekerjaya

Oleh NORRASYIDAH ARSHAD

**SHAH ALAM** - Enakmen berkaitan penjagaan kanak-kanak, warga emas dan orang kelainan upaya (OKU) bakal digubal bagi menyokong pemerkaaan golongan wanita dalam pembangunan negeri.

Dato' Menteri Besar Dato' Seri Amirudin Shari berkata penguatan kuasa dasar itu membantu wanita bekerjaya memacu ekonomi tanpa perlu bimbang penjagaan anak atau ibu bapa.

Beliau menjelaskan dasar berke-

naan juga membantu memperkemas sistem sesebuah pusat jagaan sedia ada sekali gus menjamin keselamatan warganya.

"Ini bukan perkara baharu sebab ibu bapa hantar anak ke pusat jagaan. Mungkin kita kena rangka dasar dan enakmen terhadap kerangka ekonomi penjagaan yang masih banyak tidak formal."

"Ada wanita terpaksa berhenti separuh jalan, kerjaya tersebut kerana perlu jaga anak, ibu bapa sediakan kos tinggi jika hantar ke pusat jagaan," katanya dalam simposium ekonomi penjagaan Selangor 2023 pada 30

Oktober.

Amirudin berkata perkara itu perlu diberi perhatian berikutan kadar kelahiran negeri kian berkurangan pada purata 1.9 pada 2018 ekoran kebimbangan terhadap kos penjagaan yang tinggi.

"Saya yakin pada hari ini angkanya mungkin berkurang. Pada masa sama, jangka hayat penduduk di Selangor tinggi, dua tahun setengah lebih panjang daripada jangka hayat nasional."

"Saya percaya simposium ini permulaan yang baik dan kita mahu lihat berapa nilai ekonomi, berapa kitaran ekonomi, berapa ramai dapat dijaga," katanya.

# Projek turap jalan negeri selesai

**SHAH ALAM** - Kerja turapan jalan besar-besaran meliputi semua sembilan daerah di Selangor selesai sepenuhnya, kata EXCO Infrastruktur Ir Izham Hashim.

Mengakui ada kelewatkan berikutkan faktor cuaca, beliau menjelaskan 118 projek melibatkan jarak 94.9 kilometer dijalankan bagi mempertingkat mutu jalan raya di seluruh negeri.

"Kini, kita hanya tumpu kepada pemasangan lampu solar bagi fasa kedua

yang hampir selesai dengan jumlah keseluruhan 790 tiang," katanya.

Izham turut memaklumkan pihaknya bercadang menambah lagi lampu solar di beberapa Dewan Undangan Negeri (DUN) yang keperluannya mendesak.

"Setakat ini, maklum balas penduduk positif dan ada juga wakil rakyat memberitahu ada sesetengah kawasan mereka memerlukan tambahan kemudahan berkeraan.

"Kita akan lihat dan buat pertimbangan, jika ada keperluan mendesak pemasangan lampu solar dibuat cuma tidak melibatkan semua wakil rakyat," katanya.

Projek Turapan Mega selenggaraan Infrasel Sdn Bhd (Infrasel) melibatkan 66 jalan di Petaling diikuti Klang (39), Gombak (29), Hulu Langat (27), Sepang (19), Sabak Bernam (17), Kuala Langat (16), Kuala Selangor (11) dan Hulu Selangor (lapan).

## Permaisuri lawat pameran haiwan

**SHAH ALAM** - Duli Yang Maha Mulia (DYMM) Tengku Permaisuri Selangor berkenan berangkat ke pameran Hari Haiwan Sedunia 2023 di SPCA Selangor, Ampang Jaya.

Dalam program pada 28 Oktober, Tengku Permaisuri Hajah Norashikin turut berkenan menonton demonstrasi unit anjing K9 pasukan bomba.

Menurut Selangor Royal Office di Facebook, Baginda juga menyampaikan anugerah penghargaan kepada pencinta haiwan serta menyaksikan penyerahan cek sumbangan.

"Baginda turut melawat ke ruang penjagaan kucing yang diselenggara oleh SPCA Selangor dan reruai pameran yang disediakan," menurut kenyataan tersebut.

## Giat teroka industri jana kuasa tenaga

**SHAH ALAM** - Kerajaan Negeri giat meneroka industri tenaga bagi memacu ekonomi termasuk membina loji jana kuasa di Pulau Indah, Klang yang dijadual siap pada awal tahun depan.

Dato' Menteri Besar Dato' Seri Amirudin Shari menjelaskan sub tenaga menggunakan solar dan mini hidroelektrik serta loji sisa kepada tenaga (WTE) di Jeram, Kuala Selangor juga dibina.

"Kita sudah bangunkan WTE di Jeram dan akan datang di Tanjung 12 (Kuala Langat). Beberapa tahun lagi, pihak lain juga akan berminat bangunkan WTE."

"Dalam beberapa tahun lagi dapat urus antara 7,000 hingga 8,000 tan sampah yang dihasilkan setiap hari. Sisa ini tidak lagi dilupus di tapak pelupusan," katanya pada 24 Oktober.

## Manfaat peluang ekonomi baharu

**SHAH ALAM** - Selangor sebagai pintu masuk Asean berada dalam posisi terbaik untuk memanfaatkan pelbagai peluang ekonomi menerusi Pelan Induk Perindustrian Baharu (NIMP) 2030.

Dato' Menteri Besar Dato' Seri Amirudin Shari berkata peluang tersebut dapat dicapai melalui pengukuhan sistem dwifungsi kerajaan yang berteras rakyat dan mesra perniagaan.

"Ini penting bagi merealisasikan peluang dalam Rancangan Selangor Pertama (RS-1) terutama tiga wilayah ekonomi baharu meliputi Wilayah Pembangunan Bersepadu Selatan (IDRISS).

"(Selain itu), Pembangunan Kawasan Sabak Bernam (SABDA) serta Gerbang Maritim Selangor (SMG) di sepanjang jajaran Sungai Klang," katanya pada 26 Oktober.

Mengulas sesi libat urus bersama Menteri Pelaburan Tengku Datuk Seri Zafrul Tengku Abdul Aziz pada 23 Oktober, beliau berkata Selangor berazam untuk menjayakan prinsip panduan NIMP 2030.

## RM10 juta baiki tanah runtu

**SHAH ALAM** - Peruntukan kecemasan RM10 juta diluluskan bagi menjalankan kerja pemberian cerun dan tanah runtu di Taman Bukit Mewah, Kajang, kata EXCO Infrastruktur Ir Izham Hashim.

Beliau menjelaskan pihaknya mahu kerja tersebut dibuat segera berikutan kejadian yang menjelaskan 27 keluarga yang diarah meninggalkan rumah masing-masing atas faktor keselamatan.

"Masalah ini berlaku sudah lama tetapi belum diselesaikan. Jadi, ia semakin teruk dan berlaku pergerakan tanah dalam beberapa hari lepas. Ini membawa risiko keselamatan."

"Sekarang Majlis Perbandaran Kajang uruskan kediaman sementara mangsa dengan mencari rumah sewa. Kerja menstabilkan tanah akan dilakukan segera," katanya pada 27 Oktober.

Pada Julai, Menteri Pembangunan Keraian Tempatan Menterinya Nga Kor Ming memaklumkan peruntukan RM2 juta disalur bagi kerja kecemasan kawasan itu.

## Taja bahan pendidikan digital

**SHAH ALAM** - Seramai 175 pelajar kurang berkemampuan yang bakal menduduki Sijil Peperiksaan Malaysia (SPM) mendapat akses kepada bahan pendidikan digital sumbangan Pengurusan Air Selangor Sdn Bhd (Air Selangor).

Pemangku ketua pegawai eksekutifnya berkata sumbangan langganan aplikasi Pandai Premium memanfaat 70 anak-anak warga kerja Air Selangor dan selebihnya pelajar bawah Yayasan Wilayah Persekutuan dan Kampung Batu 3, Semenyih.

Menurut Ir Abas Abdullah, agensi berkenaan turut bekerjasama dengan Pandai Education Sdn Bhd (Pandai), bawah program tanggungjawab sosial korporat bagi menyediakan kursus pendidikan yang interaktif, mampu dan lestari.

"Inisiatif ini merupakan lanjutan daripada usaha memperkasa pembelajaran dalam talian yang diperkenal pada 2020 bagi membantu anak-anak daripada golongan berpendapatan rendah (B40) meneruskan pembelajaran."

"Menerusi aplikasi Pandai Premium pelajar-pelajar bakal menduduki SPM kekal cemerlang dan terus diberikan perhatian dalam menerima pembelajaran yang berkualiti," katanya pada 27 Oktober.

Hulu Selangor, Gombak, Petaling, Shah Alam, Hulu Langat dan Sepang

	Imsak	Subuh	Syuru'	Zuhur	Asar	Maghrib	Isyak
02 Khamis	5:38	5:48	6:55	1:00	4:20	6:58	8:09
03 Jumaat	5:38	5:48	6:55	1:00	4:20	6:58	8:09
04 Sabtu	5:38	5:48	6:55	1:00	4:20	6:58	8:09
05 Ahad	5:38	5:48	6:55	1:00	4:20	6:58	8:09
06 Isnin	5:38	5:48	6:55	1:00	4:20	6:58	8:10
07 Selasa	5:38	5:48	6:55	1:00	4:21	6:58	8:10
08 Rabu	5:38	5:48	6:56	1:00	4:21	6:58	8:10

Klang dan Kuala Langat

Imsak	Subuh	Syuru'	Zuhur	Asar	Maghrib	Isyak
5:38	5:48	6:56	1:00	4:20	6:59	8:10
5:38	5:48	6:56	1:00	4:20	6:59	8:10
5:38	5:48	6:56	1:00	4:21	6:59	8:10
5:38	5:48	6:56	1:00	4:21	6:59	8:11
5:38	5:48	6:56	1:00	4:21	6:59	8:11
5:38	5:48	6:56	1:00	4:21	6:59	8:11
5:38	5:48	6:56	1:00	4:21	6:59	8:11

Sabak Bernam dan Kuala Selangor

Imsak	Subuh	Syuru'	Zuhur	Asar	Maghrib	Isyak
5:40	5:50	6:57	1:02	4:22	7:00	8:11
5:40	5:50	6:57	1:02	4:22	7:00	8:11
5:40	5:50	6:57	1:02	4:22	7:00	8:11
5:40	5:50	6:57	1:02	4:23	7:00	8:11
5:40	5:50	6:57	1:02	4:23	7:00	8:11
5:40	5:50	6:58	1:02	4:23	7:00	8:12

## Kerjasama dengan pembekal Mesir

**SHAH ALAM** - Kerjasama antara Perbadanan Kemajuan Pertanian Selangor (PKPS) dan pembekal makanan dari Mesir membuka pasaran import dan eksport makanan kering serta buah-buahan.

EXCO Pertanian Ir Izham Hashim berkata pemeteraian memorandum persefahaman (MoU) kedua-dua pihak itu sekali gus membuka ruang kepada perkongsian teknologi pertanian.

"Pada peringkat permulaan, tumpuan kita buah-buahan. Setakat ini, kita buat pembelian bernilai RM50,000 un-

tuk buah delima yang terkenal di Mesir dan keledek manis.

"Program ini antara inisiatif PKPS. Selepas ini, ada lagi kerjasama bersama syarikat dalam dan luar negara untuk perkukuhkan lagi keterjaminan makanan di Selangor," katanya.

Beliau dan Setiausaha Kerajaan Negeri Dato' Haris Kasim menyaksikan pemeteraian MoU antara PKPS dan syarikat Greenery For Agricultural Manufacturing Sdn Bhd (Greenery) pada 27 Oktober.

PKPS diwakili Ketua Pegawai Ekse-

kutifnya Dr Mohamad Khairil Mohamad Razi manakala Greenery diwakili Pen-garuh Urusan Elsayed Mohamed Abdel-gawwad Elnaggar.

Ir Izham menambah pembeli boleh memperoleh produk makanan Mesir pada harga mampu milik di semua rangkaian outlet PKPS dan trak Jualan Ehsan Rahmah mulai 28 Oktober.

"Kita jangka ada lagi produk pertanian lain dari Mesir yang akan dijual. Sebagaimana contoh, buah delima dijual tiga biji dalam satu pak pada RM10 supaya lebih ramai boleh beli," katanya.

## Dana RM10 juta, tumpu musim perayaan

# Teruskan jualan murah tahun depan

Oleh NORRASYIDAH ARSHAD

**SHAH ALAM** - Program Jualan Ehsan Rahmah (JER) kendalian Perbadanan Kemajuan Pertanian Selangor (PKPS) diteruskan tahun depan dengan tumpuan penganjuran ketika musim perayaan.

EXCO Pertanian Ir Izham Hashim berkata pentadbiran negeri meluluskan RM10 juta bagi meneruskan jualan murah untuk meringankan beban rakyat khususnya golongan berpendapatan rendah (B40).

Memanfaatkan sekitar lima juta penduduk setakat ini, beliau men-

jelaskan program akan ditambah baik seperti menambah produk sayur-sayuran dan buah-buahan selain makanan sejuk beku seperti udang.

"Selain penganjuran masih dikekalkan pada peringkat Dewan Undangan Negeri, kita juga akan perbanyakkan ketika musim perayaan utama," katanya pada 31 Oktober.

Beliau menambah harga barang yang ditawarkan dalam jualan tersebut kekal terutama ayam meskipun subsidi harga produk itu ditamatkan berkuat kuasa 1 November.



Ir Izham berkata Selangor negeri pertama memiliki simpanan bekalan makanan sebagai langkah keterjaminan makanan melalui kerjasama beberapa pihak.

"Kali ini, kita guna kaedah berbeza. Kita hendak lihat cara urus makanan kalau ada bencana. Contohnya simpanan beras, sekurang-kurangnya (bekalan) tahan tiga bulan.

"Kita akan simpan di gudang. Sekarang sedang kenal pasti makanan sesuai macam beras dan sumber protein lain," katanya.

## Produk PKPS ke Timur Tengah



makanan dari Mesir.

"Usaha sama ini membuka pasaran import dan eksport antara kedua-dua negara dalam produk seperti makanan kering serta buah-buahan selain perkongsian teknologi pertanian dari Mesir.

"Untuk permulaan, kita eksport barang seperti nanas MD2, nangka dan produk sedia dimakan. Kita sasar untuk bawa lima atau enam tan bar-

ngan seminggu," katanya pada 27 Oktober.

Penasihat Korporat Greenery For Agricultural Manufacturing Sdn Bhd Hes-hameldin Fathi pula berkata kerjasama itu peluang keemasan kepada syarikatnya untuk menembusi pasaran Malaysia.

Beliau menambah pemilihan usahasama bersama Kerajaan Negeri dibuat berikutnya Selangor dilihat sebagai negeri utama selain mewakili Malaysia dalam pelbagai hal penting.



**Anfaal (lima, kiri) melancarkan Insentif Penjagaan Anak Bagi Wanita Bekerja di Hotel Mardhiyyah, Shah Alam pada 26 Oktober. Foto FIKRI YUSOF**

5,000 terima manfaat RM1,000

# Insentif buat wanita bekerjaya

Oleh ZAREEF MUZAMMIL

**SHAH ALAM** - Kerajaan Selangor memperkenal insentif penjagaan anak yang memanfaat 5,000 penduduk negeri seterusnya meringankan kos wanita bekerja.

EXCO Pembangunan Wanita Anfaal Saari menjelaskan insentif Mama-Kerja melayakkan wanita bekerjaya yang ada tiga anak berusia 12 tahun ke bawah menerima wang tunai RM1,000.

Beliau juga menambah pengenalan program berkenaan melalui peruntukan RM5 juta dibuat selepas menyedari beban ditanggung ibu bekerja dalam menampung kos penjagaan anak.

"Insentif ini sekali gus memberi peluang kepada mereka untuk menghantar anak-anak ke pusat pendidikan dan penjagaan yang selamat serta berkualiti," katanya pada 26 Oktober.

Insentif tersebut antara sebahagian manifesto Pakatan Harapan yang ditawarkan dalam pilihan raya negeri pada Ogos.

Beliau berkata pelaksanaan tersebut juga bertujuan menyokong penglibatan wanita dalam tenaga buruh selaras matlamat Rancangan Selangor Pertama (RS-1).

Katanya, pelan lima tahun itu menggariskan kepentingan sektor penjagaan dan penyediaan pusat asuhan berkualiti termasuk taska, tadika dan transit sebagai sistem sokongan wanita bagi wanita bekerjaya.

"Wujudnya pusat penjagaan berkualiti menjamin keselamatan dan pembangunan kanak-kanak, malah ibu dapat bekerja dengan lebih tenang seterusnya meningkatkan produktiviti," katanya.

Insentif MamaKerja boleh dimohon melalui [mamakerja.selangkah.my/](http://mamakerja.selangkah.my/) mulai 1 November. Pertanyaan lanjut hubungi talian Selcare 1-800-22-6600.

Syarat kelayakan lain seperti berikut:

- Wanita bekerja dan bermajikan
  - Rakyat Selangor (lahir di Selangor atau bermastautin di Selangor melebihi 10 tahun)
  - Mengundi di Selangor
  - Berpendapatan isi rumah RM8,000 ke bawah
  - Individu yang mempunyai akaun Lembaga Hasil Dalam Negeri (LHDN) atau caruman Kumpulan Wang Simpanan Pekerja (KWSP)
  - Bukan penerima bantuan Asuh Pin-tar, Bantuan Kehidupan Sejahtera Selangor (Bingkas) dan Tunas

30,000 terima  
bantuan sokongan

**SHAH ALAM** - Lebih 30,000 wanita sama ada berkerjaya dan sebaliknya memperoleh manfaat melalui beberapa program bantuan sokongan daripada pentadbiran negeri, kata EXCO pembangunan wanita.

Anfaal Saari berkata ia antaranya Skim Bantuan Asuhan Anakku Pintar (Asuh Pintar), subsidi yuran taska atau pusat jagaan kanak-kanak RM100 selama setahun yang memanfaatkan 505 orang.

Katanya, bantuan lain Skim Bantuan Tadika Selangor (Tunas) bernilai RM50 yang disalur terus kepada tadika berdaftar dengan 2,174 individu memperoleh manfaat diperkenal sejak 2012.

"Bantuan Kehidupan Sejahtera Selangor (BINGKAS) dengan wang tunai RM300 di-salur setiap bulan selama dua tahun kepada 27,000 keluarga berpendapatan bawah RM3,000.

"Jumlah ini termasuk penerima insentif RM1,000 bagi program MamaKerja yang menyasar 5,000 wanita bekerja," katanya pada 26 Oktober.

Beliau menegaskan Kerajaan Selangor sentiasa mengorak langkah dalam membangunkan sistem sokongan bagi kaum ibu selaras Rancangan Selangor Pertama (RS-1).

## Tumpu jaminan bekalan makanan

**SHAH ALAM** - Belanjawan negeri yang bakal dibentang pada 10 November ini diharap memberi tumpuan mengenai projek jaminan makanan dan meningkatkan pendapatan petani.

EXCO Pertanian Ir Izham Hashim berkata isu berkaitan bekalan makanan yang cukup perlu dititikberatkan sebagai persediaan sekiranya berlaku bencana atau kenaikan harga terlalu mendadak.

"Kita ada mengkaji beberapa perkara antaranya alternatif mewujudkan gudang makanan dianggarkan bernilai kira-kira RM100 juta yang menyimpan pelbagai keperluan asas seperti beras dan sebagainya."

"Kajian dilakukan bersama Perbadanan Kemajuan Pertanian Selangor bagi meneliti kaedah pelaksanaan dan pengurusan gudang kerana bekalan makanan mempunyai tarikh luput," katanya pada 31 Oktober.

## Pembangunan terancang di desa

**SHAH ALAM** - Penambahbaikan prasarana di luar bandar antara yang perlu diberi tumpuan untuk memastikan penduduk menjalani kehidupan lebih selesa.

Berikut itu, EXCO pembangunan desa dan luar bandar berharap portfolionya menerima peruntukan tinggi dalam Belanjawan Selangor 2024 bagi melaksanakan usaha berkenaan.

"Fokus tahun depan mahu pembangunan yang lebih terancang di desa dan luar bandar. Kita hendak baiki balai raya dan tambah lampu jalan untuk kehidupan yang lebih selesa."

"Walaupun kita bangunkan kawasan luar bandar, namun akan dipastikan kemajuan tidak menghakis nilai tradisi kawasan itu terutama kawasan kampung," kata Datuk Rizam Ismail pada 25 Oktober.

## 5,000 sukarelawan bencana sedia bantu

**SEPANG** - Kira-kira 5,000 Sukarelawan Selangor (SERVE) bersiap siaga bagi menghadapi sebarang insiden sepanjang musim Monsun Timur Laut yang dijangka berlaku hingga Mac tahun depan.

EXCO Pengurusan Bencana Najwan Halimi berkata pentadbiran negeri sentiasa memperkemas unit itu selain menggalakkan penyertaan seramai mungkin khususnya individu berumur 18 tahun ke atas.

"Setakat ini, 1,500 sukarelawan yang aktif tetapi mengikut data, kita ada kira-kira 5,000 sukarelawan SERVE berdaftar. Kita yakin jika berlaku bencana luar jangka mereka akan turun."

"Kita juga mengalu-alukan kepada mana-mana individu yang berminat dalam aktiviti amal dan kemasyarakatan untuk menjadi sebahagian daripada sukarelawan SERVE," katanya pada 28 Oktober.

## Rumpun Selangor kukuh perpaduan

**SHAH ALAM** - Gagasan Rumpun Selangor bertujuan memperkuuh se-mangat perpaduan nasional dan sistem masyarakat di negeri ini akan dilancarkan secara rasmi awal tahun depan.

EXCO Perpaduan Datuk Rizam Ismail berkata pelaksanaannya meliputi enam agenda utama iaitu karnival, dasar dan lagu perpaduan serta penstrukturran dan pemerkasaan institusi kepimpinan kampung.

Beliau menjelaskan penjenamaan institusi pendidikan kanak-kanak khu-

susnya Tabika Perpaduan dan Tadika Kemas turut terangkum selain program promosi dan advokasi rakyat.

"Kerajaan Negeri akan memohon perkenan Duli Yang Teramat Mulia Raja Muda Selangor untuk turut berkenan berangkat ke karnival dan menyertai jelajah kampung yang bakal diadakan," katanya.

Menurutnya, program yang bakal dirasmikan Dato' Menteri Besar Dato' Seri Amirudin Shari dipilih berikutnya keunikan Selangor sebagai hos ke-

pelbagai etnik dan tumpuan untuk bekerja.

Sementara itu, Rizam memaklumkan program Kita Rewang Sekampung yang diadakan sejak awal tahun ini dijenamakan semula sebagai program Rumpun Selangor D'Desa.

Katanya, program rintis kepada Karnival Perpaduan Rumpun Selangor dianjurkan pada 21 Oktober di Kuala Selangor dan akan diteruskan ke Petaling, Sepang, Hulu Langat dan Hulu Selangor.

### Cegah penyakit dari awal

## Galak periksa kesihatan berkala

Oleh SUHAILA SHAHRUL ANNUAR

**KUALA SELANGOR** - Kerajaan Negeri akan meningkatkan program kesedaran kesihatan dan galakan saringan berkala supaya masyarakat cakna kepentingan pencegahan penyakit pada peringkat awal.

EXCO Kesihatan Awam Jamaliah Jamaluddin menjelaskan langkah itu bagi mengurangkan risiko menghidap penyakit tidak berjangkit (NCD) yang menyebabkan peningkatan kos kesihatan negara.

Katanya, negara berbelanja le-

bih RM9.65 bilion setiap tahun untuk rawatan NCD berdasarkan laporan Kementerian Kesihatan Malaysia dan Pertubuhan Kesihatan Sedunia (WHO) pada 2022.

Beliau menghargai usaha Hospital Al-Sultan Abdullah (HASA) di Universiti Teknologi Mara yang bekerjasama dengan Pfizer Malaysia Sdn Bhd bagi mengadakan program Masyarakat Sihat (MaSiH).

"Usaha ini diharap memupuk perubahan sikap masyarakat untuk ambil



berat kesihatan mereka," katanya ketika merasmikan program MaSiH dan sambutan Hari Jantung Sedunia 2023 pada 26 Oktober.

Pengarah HASA Prof Dr Sazliz Shahlan Kasim pula berkata program MaSiH adalah kerjasama melibatkan 12 siri program berasingan di Kuala Selangor yang dijayaikan mulai 7 Oktober.

"Ini titik permulaan kerjasama lebih erat bagi meningkatkan kesedaran masyarakat mengenai penyakit jantung yang menjadi pembunuh nombor satu di dunia dan Malaysia," katanya.

## Usaha perkasa program kesihatan

**KUALA SELANGOR** - Pemerkasaan kesihatan awam terutama pencegahan penyakit daripada awal diharap antara agenda utama dalam Belanjawan Selangor 2024 yang dibentang pada 10 November.

EXCO Kesihatan Awam Jamaliah Jamaluddin berharap program kesihatan popular seperti Iltizam Selangor Sihat (ISS) juga ditambah baik untuk memastikan rakyat mendapat manfaat menyeluruh.

"(Kad) ISS antaranya melayakkan penerima mendapat subsidi ketika rawatan di klinik. Selepas ini, mungkin ada pengumuman kita akan menambah baik kad itu."

"Dato' Menteri Besar Dato' Seri Amirudin Shari akan mengumumkan perkara itu (dalam Belanjawan Selangor 2024)," katanya pada 26 Oktober.

Dalam pada itu, Jamaliah berkata pentadbiran negeri terus menumpukan usaha pencegahan penyakit daripada peringkat

awal dengan menganjurkan pelbagai kempen kesedaran tahun depan.

"Tahun depan diharap akan dapat laksana lebih banyak karnival atau kempen pencegahan supaya kesihatan masyarakat terjamin. Sasaran kita untuk cegah dahulu sebelum rawat," katanya.

Program ISS menasarkan 100,000 rakyat Selangor berpendapatan rendah mendapatkan rawatan asas sehingga RM500 di klinik berdaftar selain manfaat perlindungan.

## Hulur bantuan ubat ke Palestin

**SHAH ALAM** - Worldwide Holdings Berhad (WHB) menyulur bantuan barangan perubatan dengan nilai keseluruhan RM40,000 ke Gaza bagi menuhi keperluan rakyat Palestin.

Ketua Pegawai Eksekutif Kumpulannya Datin Paduka Norazlina Zakaria berkata bekalan berbentuk benang jahitan perubatan jenama Vesti keluaran sektor perniagaan syarikat itu sendiri.

"Kami prihatin dengan situasi semasa yang berlaku di Gaza dan diharap sumbangan perubatan ini dapat menuhi keperluan kecemasan dihadapi mereka yang terjejas di wilayah itu."

"Sumbangan ini sebahagian komitmen syarikat terhadap usaha kemanusiaan global bagi meringankan penderitaan rakyat Palestin," katanya dalam kenyataan pada 27 Oktober.

Norazlina berkata sumbangan tersebut disalur melalui Kementerian Luar Negeri bagi memenuhi keperluan kritis-kal bekalan perubatan di Gaza berikutan konflik berterusan wilayah itu.

Beliau menambah anak syarikat milik penuh Perbadanan Kemajuan Negeri Selangor (PKNS) itu komited terhadap tanggungjawab sosial korporat bagi membantu golongan yang memerlukan.



Borhan (dua, kiri) bersama Mahmud (dua, kanan) melawat reruai pameran model rumah contoh dalam program Discover PKNS di Shah Alam pada 28 Oktober. Foto HAFIZ OTHMAN

**PKNS utamakan keselesaan pembeli**

# Bina 157,000 rumah mampu milik

Oleh FITRI HAZIM HAZAM

**SHAH ALAM** - Perbadanan Kemajuan Negeri Selangor (PKNS) membina 157,000 unit rumah mampu milik sejak 1964 sekali gus memenuhi matlamat menyediakan kediaman selesa untuk rakyat.

EXCO Perumahan Exco Borhan Aman Shah berkata kejayaan PKNS menerusi agenda pembangunan harta tanah juga membantu Kerajaan Negeri mencapai status negeri maju hari ini.

"Pelaksanaan projek perumahan oleh PKNS, baik kos rendah atau se-

derhana telah memberikan peluang kepada rakyat negeri Selangor memiliki kediaman yang selamat, selesa dan berkualiti.

"Walaupun pembangunan itu berkos rendah atau sederhana, kualiti rumah baik kitakekalkan," katanya ketika melancarkan program Discover PKNS Mega Akhir 2023 di sini pada 28 Oktober.

Borhan menjelaskan PKNS bukan sahaja sebagai syarikat pembangunan harta tanah tetapi juga berperanan sebagai pemangkin pembangunan masyarakat setempat.

"PKNS juga banyak mencipta pe-

luang pekerjaan dan membina komuniti setempat yang sempurna dengan penyediaan prasana yang komprehensif," katanya.

Ketua Pegawai Eksekutif PKNS Dato' Mahmud Abbas pula berkata pihaknya mahu menjadikan program itu acara tahunan susulan sambutan yang memberangsangkan pada siri jelajah sebelum ini.

"Empat siri jelajah di Kota Puteri, Antara Gapi, Bangi dan Kompleks PKNS Shah Alam dihadiri 40,000 pengunjung. Kita mahu teruskan untuk eratkan hubungan dengan masyarakat," katanya.

memantau semua aspek termasuk isu keselamatan.

"Kita akan lihat kekerapan kutipan sisa elektronik ini kerana tidak mahu timbulnya isu keselamatan. Semua tahu barang ini berkait dengan keselamatan."

"Kita lihat kesesuaian lokasi stesen sebab bukan semua tempat boleh diletak kios. Jadi, projek rintis dilaksana supaya lebih banyak stesen minyak mahu bekerjasama," katanya.

## Terima insentif dalam 14 hari

**SHAH ALAM** - Penerima insentif MamaKerja bakal menerima RM1,000 dalam tempoh 14 hari selepas permohonan lengkap dibuat, kata Dato' Menteri Besar Dato' Seri Amirudin Shari.

Beliau menjelaskan inisiatif yang terkandung dalam manifesto Kerajaan Negeri yang ditawarkan dalam pilihan raya negeri pada Ogos dibuka mulai 1 November.

"Bantuan akan disalur dalam tempoh 14 hari bekerja selepas permohonan dibuat," katanya pada 27 Oktober.

Insentif MamaKerja boleh dimohon melalui mamakerja.selangkah.my/. Pertanyaan lanjut hubungi talian Selcare 1-800-22-6600.

## Miliki kediaman lengkap perkakas

**SHAH ALAM** - Pembeli hartanah projek yang dibina Perbadanan Kemajuan Negeri Selangor (PKNS) bakal menikmati potongan harga hingga 46 peratus bagi produk perkakas rumah jenama Samsung.

Ketua Pegawai Eksekutifnya Dato' Mahmud Abbas menjelaskan tawaran eksklusif sejak 1 Oktober itu bertujuan menghargai pembeli yang sentiasa menyokong projek pembangunan PKNS.

"Pembeli bukan sahaja bakal memiliki rumah sendiri tetapi juga berpeluang menggunakan produk Samsung yang terbukti mempunyai kualiti terbaik."

"Tawaran tersebut membantu mereka menyediakan kelengkapan seperti televisyen, peti ais dan mesin basuh yang memberi nilai tambah dan menjimatkan," katanya pada 28 Oktober.

Pembeli rumah PKNS boleh melayari laman sesawang www.pknshomebuyers.my untuk mengetahui lebih lanjut mengenai tawaran berkenaan.

## Tumpu lima sektor pembangunan

**SHAH ALAM** - Selangor memberi tumpuan kepada lima sektor bagi menyokong matlamat negeri yang mahu memajukan pembangunan secara lestari, kata EXCO Alam Sekitar Jamaliah Jamaluddin.

Beliau menjelaskan penekanan berkenaan melibatkan sektor daya tahan dan pengurusan bencana, negeri rendah karbon, biodiversiti dan sumber asli serta pengurusan air dan sisa.

"Penumpuan kepada sektor ini dipilih berdasarkan keadaan alam sekitar negeri dan global, status terkini dan hasil penyelidikan yang selaras dengan pelaksanaan matlamat pembangunan mampu (SDG) menjelang 2035."

"Rancangan Selangor Pertama yang diluncur tahun lalu turut mengambil pendekatan strategik berlandaskan prinsip alam sekitar, sosial dan tadbir urus," katanya.

## Tiga kios buang sisa elektronik

**SHAH ALAM** - Kios pembuangan sisa elektronik disediakan di tiga stesen minyak sekitar Bandar Utama, Petaling bagi memudahkan orang ramai melupus alat peranti.

EXCO Alam Sekitar Jamaliah Jamaluddin berkata inisiatif dengan kerjasama stesen BP Petrol dan Petronas yang dijangka bermula akhir tahun ini menjadi projek rintis sebelum ia diperluas.

"Kita ada tempat buang sisa elektronik di pihak berkuasa tempatan teta-

pi bukan semua ada. Jadi, sukar untuk orang awam buang peralatan mereka. Dengan adanya kios ini, ia lebih mudah."

"Stesen minyak juga kawasan tumpuan. Mereka boleh bawa bila-bila masa tetapi peranti mesti bersaiz kecil seperti bateri, telefon bimbit, pengecas bateri tambahan," katanya.

Beliau dalam sambutan Hari Alam Sekitar Negara 2023 peringkat negeri pada 28 Oktober berkata pihaknya bersama Jabatan Alam Sekitar juga

## Tiga lokasi karnival Deepavali

**SHAH ALAM** - Yayasan Hijrah Selangor (Hijrah) meneruskan penganjuran Karnival Deepavali tahun ini di tiga lokasi selama seminggu mulai 5 November.

Ketua pegawai eksekutifnya berkata karnival di Klang, Sri Muda dan Ampang bakal menghimpunkan 150 usahawan bawah program Pembangunan Usahawan India Selangor (Sitham).

"Penganjuran kali ini agak berbeza kerana diadakan secara fizikal dan dalam talian menerusi platform TikTok. Ini sebahagian usaha menginovasi perniagaan dengan pendekatan teknologi."

"Selaras agenda Selangor menuju ke Negeri Pintar menjelang 2025, penambahan kepada platform digital dapat meningkatkan pendapatan usahawan," kata Dato' Mearia Hamzah pada 25 Oktober.

## RM300,000 bantu OKU, belia niaga

**SHAH ALAM** - Sebanyak RM300,000 diperuntuk bagi membantu usahawan India dalam kalangan orang kurang upaya (OKU) dan belia untuk mengembangkan perniagaan pada tahun hadapan.

Pengurus program Pembangunan Usahawan India Selangor (Sitham) Kenneth Sam berkata pihaknya memberi tumpuan kepada dua golongan itu berikutan kurangnya penyertaan mereka sebelum ini.

"Kita dapat pembabitan dua golongan ini ada tetapi kurang berbanding penyerataan ibu tunggal dan wanita. Kita muah bantuan disediakan ini seimbang dan memanfaatkan semua golongan."

"Selain itu, kita bantu memasarkan produk usahawan ke peringkat antarabangsa. Kita sasar dua jenis produk iaitu tekstil serta makanan dan minuman yang menggunakan teknologi retort," katanya pada 25 Oktober.

## Buah delima RM10 di rangkaian PKPS

**SHAH ALAM** - Orang ramai berpeluang mendapatkan buah delima gred A di semua rangkaian Perbadanan Kemajuan Pertanian Selangor (PKPS) dan trak Jualan Ehsan Rahmah (JER).

Menurut agensi pertanian negeri itu, buah yang diimport syarikat pembekal makanan dari Mesir itu dijual pada harga RM10 untuk tiga biji menerusi promosi hingga Disember.

"Jom dapatkan buah delima gred A di empat outlet PKPS dan tiga lokasi trak JER. Tiga biji RM10 sahaja," tulisnya di Facebook pada 29 Oktober.

Lokasi jualan di Outlet Wisma PKPS, Seksyen 14 dan Seksyen 9 Shah Alam, Outlet Ehsan PKPS, Meru, Kios Ehsan Selangor Fruit Valley serta tiga lori JER (tiga lokasi).

## Jarak tidak halang ke jualan murah

**SHAH ALAM** - Seorang lelaki sanggup memandu kira-kira 40 minit dari Puchong ke Seksyen 18 di sini, demi membeli barang asas pada harga murah di Jalan Ehsan Rahmah (JER).

Pemandu lori Abu Bakar Hamzah, 50, mengakui sering mengikuti JER kerana barang ditawarkan amat murah dan berkualiti berbanding di pasaran.

"Kalau tiada JER dianjurkan di Puchong saya akan cari di Shah Alam, memang dua lokasi ini kerap dikunjungi. Saya sering mengikuti Facebook Perbadanan Kemajuan Pertanian Selangor (PKPS) untuk tahu lokasi jualan."

"Saya beli beras, ayam, telur, ikan dan beberapa barang kering lain. Harap

program ini dapat dianjurkan lebih kerap di satu-satu kawasan," katanya.

Beliau antara ratusan pengunjung jualan murah peringkat Dewan Undangan Negeri (DUN) Batu Tiga di Surau Al-Amin, Seksyen 18 pada 29 Oktober.

Nah Kim Hew, 53 mengakui JER amat membantu golongan berpendapatan rendah (B40) membeli barang keperluan asas.

"Saya berharap selepas ini pihak PKPS boleh banyakkan lagi nombor giliran supaya semua pengunjung dapat beli barang dan tidak pulang dengan sia-sia," jelasnya.

Bagi suri rumah M Komathi, 38, pembelian ba-

rangan seperti beras, telur dan tepung adalah sebahagian persiapan menjelang sambutan Deepavali.

"Terima kasih PKPS kerana mengajukan JER dan saya berharap program jualan murah ini dapat dianjurkan lebih kerap apabila Deepavali semakin hambar," katanya yang berbelanja lebih 10 kali.

JER menawarkan ayam RM10 se-ekor, daging pejal segar (RM10 setiap pek), telur gred B (RM10 seapan), ikan kembung (RM6 setiap pek), minyak masak lima kg (RM25) dan beras lima kg (RM10).

Lokasi terkini jualan murah boleh disemak di Facebook PKPS atau mengimbas kod QR di poster jualan atau pautan [linktr.ee/myPKPS](http://linktr.ee/myPKPS)



## Sedia bimbingan, bantuan alatan

# RM2.9 juta manfaat 3,000 usahawan

Oleh **SITI ROHAIZAH ZAINAL**

**SHAH ALAM** - Yayasan Hijrah Selangor (Hijrah) berbelanja RM2.9 juta bagi menjayakan program Pembangunan Usahawan India Selangor (Sitham) sejak empat tahun lalu.

Ketua Pegawai Eksekutifnya Dato' Mearia Hamzah berkata seramai 3,730 usahawan dibimbing menerusi latihan pembangunan, kursus kemahiran dan pembuatan sepanjang tempoh berkenaan.

"Sitham diperkenal bagi membantu menaik taraf kehidupan dan ekonomi

menerusi janaan pendapatan dengan kemahiran sendiri selain melahirkan usahawan India yang berdaya saing.

"Kita anjur pelbagai program antaranya bantuan peralatan perniagaan, program bimbingan perniagaan, kursus kemahiran dan pembuatan serta latihan pembangunan usahawan," katanya.

Beliau menghadiri majlis taklimat dan penghargaan ketua komuniti India di bangunan pentadbiran negeri di sini pada 25 Oktober.

Mearia berharap individu yang dilantik sebagai ketua komuniti dapat memanfaatkan peruntukan diberi dengan menganjurkan program bagi



membantu usahawan India.

"Setiap ketua komuniti terima RM5,000 tahun ini berbanding RM3,000 sebelum ini. Dengan adanya penambahan ini, kita berharap mereka dapat anjurkan kursus yang lebih berkesan," katanya.

Dilancarkan pada September 2019, Sitham memberi tumpuan kepada usahawan India yang mahu memajukan perniagaan menerusi latihan pembangunan, kursus kemahiran dan pembuatan.

Program bawah kelolaan Hijrah itu turut menawarkan bimbingan dan bantuan peralatan perniagaan (geran). Mereka yang berminat boleh memohon menerusi laman sesawang Hijrah Selangor.

## Ceria terima bantuan alatan niaga

**KUALA LANGAT** - Impian penjual sayur Lim Kei Chin, 69, untuk memiliki sebuah motosikal roda tiga bagi memudahkan urusan hariannya tercapai apabila terpilih menerima Bantuan Blueprint Pembasian Kemiskinan.

Mengakui sangat gembira menerima bantuan berkenaan, peniaga Pasar Borong Tanjong Sepat sejak empat tahun lalu itu berkata sebelum ini terpaksa menggunakan kereta yang uzur untuk berulang-alik ke Banting bagi mendapatkan bekalan jualan.

"Gembira dapat bantuan ini dengan pertolongan ketua kampung yang bantu buatkan permohonan. Se-

belum ini saya risau untuk bermiaga kerana bergantung dengan kereta yang sudah uzur dan selalu rosak sehingga menjelaskan perniagaan."

"Bantuan motosikal roda tiga ini bagi saya semangat untuk terus bermiaga dan mencari rezeki. Terima kasih Kerajaan Negeri," katanya baru-baru ini.

Peniaga buah-buahan dan ikan segar Mohd Yusof Bakri, 70, berkata bantuan peti sejuk beku bernilai RM7,000 yang diterima sangat membantu operasi perniagaannya.



"Bagi peniaga barang basah sangat penting untuk memiliki peti sejuk. Kalau tidak habis dijual, boleh disimpan untuk mengekalkan tahap kualiti."

"Tanpa bantuan ini, saya tidak mampu membeli peti ais, bersyukur sangat dengan bantuan yang diterima," katanya yang bernaung di Jalan Bandar Lama, Telok Panglima Garang.

Sementara itu, peniaga nasi claypot Thamil Kodi Karuppannen, 50, terharu dengan bantuan peti ais, ketuhar mikro dan periuk nasi bernilai RM10,000 untuk menjalankan perniagaan di Bandar Parkland, Klang.



## Lonjak industri seni

Oleh NORRASYIDAH ARSHAD & SHEEDA FATHIL

**P**engurangan duti hiburan dalam Belanjawan 2024 bagaikan cahaya di hujung lorong buat penggiat seni tempatan yang selama ini terbeban lantaran terpaksa menanggung cukai tersebut.

Mereka terpaksa memikul bebanan tersebut meski keuntungan bersih dari penghasilan produk kreatif tidak seberapa kerana terikat syarat wajib pembayaran duti berkenaan.

Bekas penyanyi rap arus perdana Altimet yang popular dengan lagu Amboi dan Kalau Aku Kaya percaya pengurangan duti membantu masyarakat seni untuk menjana pendapatan lebih tinggi.

Inisiatif sedemikian berupaya mengurangkan beban kos penganjuran acara seni sekali gus artis tempatan berpeluang memperoleh bayaran lebih tinggi setiap kali mengadakan persembahan.

"Pengurangan duti memberi pulangan besar kepada pengajur. Ini memberi tempias kepada artis dan mendapat bayaran lebih tinggi," kata pemilik sebenar nama Syed Ahmad Syed Abdul Rahman Alhadad.

Justeru, Altimet yang kini wakil rakyat Lembah Jaya mengajak kerajaan negeri lain mencontohi langkah yang asalnya dipelopori Selangor demi memajukan lagi industri kreatif di Malaysia.

Selangor memberi pengecualian setahun untuk bayaran masuk pertunjukan pentas (berticket) melibatkan artis tempatan tahun lalu. Ia kemudian diperluas kepada Wilayah Persekutuan dalam belanjawan yang dibentang Perdana Menteri Datuk Seri Anwar Ibrahim.

Kerajaan mahu memberi pengecualian penuh untuk persembahan pentas artis tempatan dan 10 peratus bagi artis antarabangsa serta acara hiburan lain termasuk tayangan filem, acara sukan dan permainan.

Anwar dalam pembentangan pada 13 Oktober juga menyeru kerajaan negeri supaya mempertimbang pengurangan sama demi menyokong perkembangan bakat kreatif tempatan.

Mengalu-alukan langkah tersebut, Dr Mohammad Hatta Azad Khan yang

mengarahkan sitkom popular Pi Mai Pi Mai Tang Tu berkata kos untuk berkarya besar sedangkan pulangannya berisiko.

Pengarah filem Mat Som itu juga berharap kutipan duti dipulangkan kepada penerbit seperti amalan sebelum ini, apakah lagi pawagam mengambil peratusan tinggi hingga membebankan produksi.

"Pemulangan duti kepada penerbit membantu mengimbangi kos penerbitan dan pulangan, setidak-tidaknya memberi sedikit keuntungan untuk memulakan produksi akan datang," katanya.

Beliau turut mencadangkan pengurangan duti diselaras semua negeri atau dimansuhkan terus pada masa depan bagi mengembalikan kegemilangan industri kreatif di negara ini.

"Contoh terbaik seperti di Korea. Teater, filem, muzik, sastera, seni lukis semuanya wajar dilihat sebagai identiti nasional yang menyerlahkan negara di mata dunia," katanya.

Pengarah dan pelakon Hans Isaac pula berharap pengajur acara termasuk konsert tidak mengambil kesempatan terhadap pengurangan itu sebaliknya mengecilkan caj kepada orang ramai.

"Mereka janganlah kenakan caj konsert mahal sangat. Kerajaan sudah beri peluang, sepatutnya apabila tiada 25 peratus duti hiburan, caj tidak sepatutnya tinggi," katanya.

### Gah tanpa kemewahan

Bekas pengurus Perbadanan Kemajuan Filem Nasional Malaysia (Finas) itu juga menyarankan kaedah pengurangan duti dibuat lebih terperinci supaya semua pihak jelas tanpa kekeliruan.

Sementara itu, pengurus acara yang kerap menganjur konsert antaranya kumpulan Slam, Radja dan Kris Dayanti, Fandy Alias mendedahkan industri muzik cuma gah di mata banyak sedangkan ia tidak semewah seperti sangkaan ramai.

"Ya, orang nampak dunia seni itu seronok, mewah. Kita panggil artis sana sini, buat konsert besar-besar. Nampak seronok tetapi di sebaliknya hanya kami sahaja yang tahu."

"Jadi, apabila perdana menteri umum mahu mansuh duti hiburan, ini satu bonus sebab kami mampu menjana pendapatan tinggi, yang

“

Mereka janganlah kenakan caj konsert mahal sangat. Kerajaan sudah beri peluang, sepatutnya apabila tiada 25 peratus duti hiburan, caj tidak sepatutnya tinggi



lebih utama industri hiburan kita mampu pergi jauh," katanya.

Fandy juga mengeluh kerana pengajur konsert perlu membayar antara 15 hingga 25 peratus harga jualan tiket kepada pihak berkuasa tempatan (PBT) untuk mendapat permit dan lesen.

"Sebelum mula konsert, PBT minta rekod tempahan tiket. Daripada situ, mereka kenakan cukai kepada kita. Cukai bukan dikenakan selepas keuntungan bersih tetapi nilai kasar.


"Contohnya, kita kutip RM100,000. Kos pengajuran RM60,000. Dari situ, kena bayar 25 peratus kepada PBT. Jadi, untung bersih tidak banyak. Selepas tolak kos, berapa sahaja yang tinggal?" katanya.

Sutradara Datuk Prof A Razak Mohaideen pula menganggap bebanan duti hiburan boleh 'membunuh' industri hiburan sekali gus membantutkan perkembangan seni tanah air.

Pengarah filem Mami Jarum itu sentiasa berharap kutipan sekali ganda kos pembikinan bagi memperoleh keuntungan kerana membayar 25 peratus kepada kerajaan negeri dan pawagam.

"Sebabnya, 25 peratus kena beri kepada kerajaan negeri. Untuk pawagam, minggu pertama kena bayar 45 peratus, minggu kedua 50 peratus, minggu ketiga 55 peratus. Berapa yang tinggal?

"Dengan ada untung, baru produser dapat buat filem lain tapi kalau tidak, ini memberi kesan," kata pensyarah Fakulti Filem, Teater dan Animasi Universiti Teknologi Mara itu.



# Tragedi 2 November

Palestin belum terbentuk dengan rasmi sebagai sebuah negara seperti Malaysia atau Jepun yang berdaulat sepenuhnya dan diiktiraf Pertubuhan Bangsa-Bangsa Bersatu (PBB).

Wilayah ini berada dalam kekuasaan beberapa empayar Islam, terakhir Uthmaniyah, sebelum dikuasai penjajah Britain yang memecahkan kawasan-kawasan ini kepada negara bangsa moden seperti dikenali sekarang.

Wilayah asal Palestin, termasuk Gaza dan Tebing Barat, masih dikuasai Israel melalui undang-undang dan ketenteraan. Jadi semua proses asas kawalan kenegaraan hanya diperolehi sedikit sahaja oleh Fatah dan Hamas yang masing-masing mentadbir Tebing Barat dan Gaza.

Di PBB, Palestin tidak dianggap negara anggota tetapi hanya negara pemerhati bukan anggota (non-member observer state) setelah resolusi 67/19 diluluskan pada 29 November 2012.

Bagaimana masa depan wilayah ini dan nasib 12 juta rakyatnya? Selangorini menghurai apa yang terjadi dalam tempoh 100 tahun lalu hingga dunia kini berdepan “permasalahan Palestin”.

**1897** Kongres pertama gerakan Zionis di Basel, Switzerland pada 29 Ogos. Ia memutuskan perjuangan “mendirikan sebuah negara untuk kaum Yahudi di Palestin dengan perlindungan undang-undang”.

Setelah pengasasnya Theodor Herzl gagal dapatkan autonomi tanah daripada sultan Uthmaniyah, gerakan ini meraih sokongan Britain. Pada 1903, kuasa penjajah ini mencadangkan tanah seluas 15,500 km persegi di Uganda kepada Zionis tetapi ditolak.

**1917** Setiausaha Luar Britain Arthur Balfour berjanji serahkan tanah Palestin kepada pendatang Yahudi pro-Zionis dalam surat pendeknya bertarikh 2 November.

Warkah ini hanya 67 perkataan tetapi membawa malapetaka besar kepada Palestin hingga ke saat ini.

Kerajaan Uthmaniyah tewas di tangan Britain dalam Perang Jerusalem selama enam minggu bermula 17 November.


Sewaktu Jeneral Edmund Allenby melangkah masuk pada 11 Disember, beliau dilapor berkata “kemenangan tentera Salib kini sudah lengkap.” Britain kuasai penuh Palestin setahun kemudian.

**1922** Britain mula mentadbir Palestin bawah mandat Liga Bangsa-Bangsa (badan lama sebelum PBB) sehingga 1948.

Menurut rekod rasmi Britain, hampir 380,000 pendatang Yahudi masuk ke Palestin mulai tahun ini hingga 1946.

**1935** Ulama dan pejuang terkenal Izzuddin al-Qassam terbunu, mendorong penentangan lebih bersemangat terhadap kuasa asing dan kumpulan Zionis. Briged al-Qassam, sayap pejuang Gerakan

## WILAYAH PALESTIN MENYUSUT KE TANGAN ISRAEL, 1917-1995



Penentangan Islam (Hamas), diberi nama sempena tokoh ini.

**1936** Penentangan umat Islam Arab diteruskan lagi dan dipertingkat mulai 19 April tetapi berjaya ditundukkan 26 Ogos tiga tahun kemudian dalam peristiwa Pemberontakan Besar Arab.

**1947** PBB, terbentuk pada 1 Ogos 1946 daripada negara kuasa besar yang menang Perang Dunia Kedua, buat keputusan pecahkan Palestin kepada negara Yahudi dan negara Arab dalam Resolusi 181. Waktu ini 67 peratus penduduk, atau 1.2 juta orang, masih lagi warga Arab yang menguasai 94 peratus tanah.

**1948** Britain melepaskan mandat, Israel isytihar

kemerdekaan pada 15 Mei yang mendorong negara jiran Arab melancarkan perang.

Tanggal ini digelar Nakbah, atau malapetaka besar, yang dikenang seluruh warga Palestin setiap tahun.

Seramai 15,000 penduduk Palestin terkorban dan 750,000 dihalau ke negara-negara jiran. Enam juta keturunan mereka ini berada di 58 kem pelarian yang daif.

**1950-an (hujung)** Fatah, asalnya Gerakan Kebangsaan Pembelaan Palestin, ditubuhkan. Ia menjadi kumpulan terbesar dalam Pertubuhan Pembelaan Palestin (PLO) dan sekarang membentuk parti yang menguasai Tebing Barat.

**1964** Pertubuhan Pembelaan Palestin (PLO) ditubuhkan pada 2 Jun sebagai gabungan semua gerakan penentangan terhadap penguasaan Israel.

Banyak perjanjian dengan kuasa Barat dan pertubuhan didunia dibuat melalui PLO yang diiktiraf sebagai wakil penduduk Palestin.

**1967** Israel berjaya menguasai timur Jerusalem, Gaza, Tebing Barat, Bukit Golan (milik Syria) dan Sinai (Mesir) dalam Perang Enam Hari pada 5 Jun. Peristiwa duka akibat tewasnya negara-negara Arab ini disebut Naqsar atau kemunduran.

Pada 22 November, Majlis Keselamatan PBB sebulat suara meluluskan resolusi 242 yang mendesak Israel menyerahkan semula wilayah yang dirampasnya dalam “konflik terkini” dan menghormati semua kedaulatan negara yang bertelagah.

Selain keputusan PBB pada 1947, resolusi ini sering dianggap sebagai atas penyelesaian dua negara dalam beberapa rundingan damai. Namun semua cadangan ini belum berjaya.

**1973** Perang tercus lagi antara negara-negara Arab dan Israel selama lebih dua minggu mulai 6 Oktober di Bukit Golan, Sinai dan Suez.

**1978** Perjanjian kem David pada 1 September antara Mesir dengan Israel.

**1979** Israel keluar dari Sinai selepas termeterai perjanjian damai dua negara ini. Sekali gus, Mesir menjadi negara Arab pertama mengiktiraf negara Israel. Hubungan diplomasi dan dagang berjalan.

**1987** Intifadah, atau kebangkitan, pertama dilancarkan pada 1 Disember bagi menentang kependudukan Israel di Gaza dan Tebing Barat.

Imej pemuda Palestin membaling batu ke arah kereta kebal menjadi simbol utama penentangan ini yang korbankan kira-kira 1,300 pejuang dan 200 Israel.

Sebagai cabang gerakan Ikhwanul Muslimin, Hamas ditubuhkan oleh Syeikh Ahmad Yassin untuk membebaskan Palestin daripada penaklukan Israel.

# Tersorok di sebalik bayang al-Aqsa

Oleh ARIF MUSTAQIM BIN MD SALLEH

Ilustrasi FAHMI MUSTAFFA

**W**anita memakai abaya hitam duduk di atas dua kakinya, terlipat di bawah paha.

Lehernya ditutupi syala kelabu berbingkai benang putih, tunduk penuh khusyuk. Sebentar diusap pipinya dengan kain syala itu. Air mata mengalir di pipi. Wanita itu menangis.

Doktor Amira Yousef, pendidik dan pendakwah yang amat berjasa baik di wilayah utara Gaza dan di institusi-institusi pengajian di Jabalia. Tetapi, di hadapan kiblat pertama umat Islam, dia teresak-esak menangis seperti anak kecil dalam kekaguman, sedih dan pilu. Namun, dia terus berdoa.

Pagi Jumaat yang berkat itu seperti hari-hari lain, kawasan Baitulmuqaddis dibanjiri manusia sejak pagi. Matahari menjunamkan sinarnya dengan keras, namun setiap jemaah – baik yang sedang melakukan solat sunat, berzikir atau membaca al-Quran di dalam Masjid al-Aqsa, tidak langsung menghiraukan orang sekeliling. Mereka khusyuk dan takwa mencari keampunan dan keredaan.

Dia adalah ratusan manusia berteleku di bawah bayangan al-Aqsa mengubati hati yang marah, memohon kedamaian jiwa yang menderita. Hanya di sini segala-gala diharap akan luput, dalam doa kepada tuhan.

Selesai membaca doa, tangannya perlakan jatuh. Dia tunduk. Ingatan yang bercelarau tadi kembali tenang. Dia berpaling ke kiri lalu dan tersentak melihat tubuh berselimut kain lusuh. Kepala bertudung litup, wajahnya sukar dikenali. Orang itu duduk di sebelahnya.

“Assalamu’alaikum!”

Dia menghulur tangan untuk bersalam. Tetapi orang itu tidak menjawab salamnya, tangannya juga tidak disambut. Aneh, salam tidak dijawab, tangan juga tidak dijabat. Pasti orang itu bukan daripada golongan Muslimin.

Duduknya pun kelihatan kekok. Bukan seperti duduknya orang Muslimin berhampiran rumah suci yang ketiga besar fadilatnya ini.

“Siapakah kamu ini, malaikat atau syaitan?” Dia berterus-terang, tubuh itu masih tunduk seperti mahu menyembunyikan identitinya.

Ruang legar di tepi Masjid al-Aqsa yang mengelilingi bukit batu terus didakap sepi yang dingin dalam dinihari. Beberapa lampu yang terpasang hanya memancarkan cahaya suram dan samar.

“Siapakah kamu ini?”

“Tunjukkan wajahmu, sama ada kamu malaikat yang turun dari langit atau syaitan?” Suaranya mulai keras sehingga tubuh itu tersentak

memandang ke arahnya. Kemudian, lilitan kain tebal yang membalut mukanya perlakan dirungkai. Wajah terdedah.

“Err kau, Golda Meir?”

Tika ini dia pula yang disula gugup. Tergawang-gawang tangannya tidak tentu arah. Sekujur tubuh dan wajah perempuan itu amat cengkung, pucat bagaikan sekujur rangka. Sebuah senyuman dibibir terlalu kering terlontar bersama-sama anggukan yang daif, di hujung gugup.

“Tapi, tapi .... Golda Meir, Perdana Menteri Israel Wanita itu, sudah mati. Rakyat Israel sangat berduka atas pemergian itu, sekarang mungkin mereka sudah lupa kerana kepimpinan sudah berubah banyak kali daripada Rabin, Peres, Barak, Sharon dan Netanyahu. Bukanlah benar kau sudah mati, Golda Meir?”

“Benar!”

“Jadi?”

“Demi Tuhan, aku ke mari untuk menemui kau, wahai Doktor Amira.”

“Untuk apa?”

“Aku sesat di pertengahan jalan. Aku teraba-raba dalam kegelapan mencari arah menuju akhirat.” Golda Meir seperti dalam kelemasan, menggerakkan tangannya ke sekeliling.

Mengeleng-geleng. Tiba-tiba Doktor Amira pecah ketawa. Golda Meir dalam kelemasan itu sebenarnya suatu kelucuan. Ketawanya memanjang berdekah-dekah hingga bekas musuh umat Islam Palestin itu mendongak melihatnya. Ia sembilu tajam yang menikam ulu hatinya sehingga menjadi terlalu pedih.

“Kau sindir aku, Doktor Amira.”

“Aku berasa lucu mendengar ceritamu. Kerana kegagalanmu mencari akhirat berpunca daripada kesilapan kamu dan orang-orang Israel seperti kamu, seperti Rabin, Peres, Barak, Sharon dan Netanyahu.”

“Mengapa begitu rendah anggapanmu terhadap bangsa Israel?”

“Kerana memusuhi Islam dan melakukan kekejaman terhadap orang Islam. Lupakah peristiwa kamu mengusir 415 orang penduduk Palestin dari kampung halaman mereka ke sebuah kawasan yang tiada berpenghuni, gersang, di selatan Lubnan?”

Perempuan itu mengangguk dalam pilu. Ketika itu, dialah Perdana Menteri Israel sebelum diambil alih Yitzhak Rabin. Perempuan itu terus tunduk dalam penyesalan yang panjang. Kedinginan dinihari bertukar bara api.

“Nah, ketika perang enam hari dalam tahun 1967, kau sebagai Presiden yang memberi arahan kepada Angkatan Bersenjata Israel, menyebelih tahanan-tahanan perang Mesir. Lagi-lagi kau

lakukan kekejaman terhadap orang-orang Islam. Ramai pejuang Palestin yang mati di tanganmu. Kau bertanggungjawab membunuh ratusan nyawa kanak-kanak, orang tua, pemuda dan wanita hamil yang tidak bersalah!”

“Bukanlah tanah ini hak kami?”

“Benar,” balas tubuh itu.

“Alangkah mulianya jika kebenaran ini kau akui ketika kau masih hidup dulu.”

“Doktor Amira, kematian menjadikan aku sedar, menjadikan aku mengerti bahawa Tuhan telah menentukan hak-hak ke atas hambanya, tapi ketika itu aku terpaksa patuh akan dasar Zionis. Aku sendiri sudah bosan dengan persengketaan yang tak pernah selesai. Aku benci kepada perperangan, kerana persengketaan dijadikan alat perniagaan senjata, alat kerakusan nafsu kuasa-kuasa besar. Nah, masyarakat antarabangsa perlu bersatu dan bangun menentang anasir-anasir jahat, ganas yang berbahaya itu.”

Ah, benarlah kematian telah menyedarkan Golda, seorang Zionis yang jahat. Tutur katanya kini bukanlah seperti Golda sewaktu dalam hidupnya.

Amira mengulang sepotong firman Allah dalam surah Ali-Imran ayat 200, ‘Wahai orang-orang beriman! Bersabarlah kamu menghadapi segala kesukaran dalam mengerjakan perkara-perkara yang berkebaikan dan kuatkanlah kesabaran kamu lebih daripada kesabaran musuh di medan perang dan bersedia lah dengan kekuatan pertahanan di daerah-daerah sempadan serta bertakwalah kamu kepada Allah supaya kamu berjaya mencapai kemenangan.’

“Jadi kau akan menggerakkan usaha-usaha dakwah dalam ceramah dan kuliahmu untuk berperang, wahai Doktor Amira?” Golda bertanya dengan sedikit gugup.

“Allah perintahkan kita untuk berperang jika kita diperangi.”

Masjid al-Aqsa dan Masjid Omar menjadi saksi perbualan mereka, didepani dua buah gunung dan kota lama yang penuh dengan duri persengketaan sejak 50 tahun lalu. Angin sejuk mendesir, sepi dinihari memeluk Baitulmuqaddis yang disula kemuraman lampu-lampu jalan.

“Golda! apa kau ingat dengan kata maaf, segala kekejaman dan kerakusan kau, Rabin, Peres, Barak, Sharon dan Netanyahu akan kami maafkan?” Amira menggema soalan.

“Sepi. Sepi tiada jawapan.

“Golda! Mengapa kini kau diam?”

Sunyi.

“Golda!”

Allahuakbar! Allahuakbar! Azan subuh bergema meniti ruang angkasa Baitulmuqaddis.





Pengunjung membeli cenderamata di reruai wakil Thailand ketika pameran produk seni dan makanan tradisi pada 23 September



Persidangan seni melibatkan semua negara peserta diadakan di Dewan Sivik MBPJ pada 23 September



Anfaal bersama Dr Mohamad Fahmi (kanan) dan Mohamad Azhan (kiri) merasmikan Festival Cerita Rakyat Belia Asia Pasifik 2023



Penggubah lagu Dr Mohd Azhar Abu Bakar @ Dr Azmeer memberi penerangan kepada peserta seminar kerjaya seni pada 23 September




Anfaal dan Mohamad Azhan bersama peserta Timor Leste memperaga busana dan kraftangan di reruai negara tersebut pada 23 September



Peserta India mempersembahkan tarian klasik ketika festival di Laman MBPJ pada 24 September



Penari wanita Bangladesh dengan pakaian tradisi mempersembahkan keunikan seni negara itu pada 24 September



**FESTIVAL** Cerita Rakyat Belia Asia Pasifik julung kali dianjurkan oleh Majlis Bandaraya Petaling Jaya (MBPJ).

Diadakan antara 21 hingga 26 September, ia disertai 26 negara antaranya Indonesia, Singapura, Jepun, China, India, Thailand, Iran, Filipina, Sri Lanka, Timor Leste dan Lithuania.

Untuk menjaya festival ini, MBPJ mengadakan kerjasama dengan Majlis Antarabangsa Pertubuhan Festival Cerita dan Kesenian Rakyat (CIOFF) Malaysia, rakan rasmi badan pendidikan dan kebudayaan Unesco.

Festival itu dirasmikan EXCO Pembangunan Wanita dan Kebajikan Masyarakat Anfaal Saari pada 23 September.

Majlis tersebut turut dihadiri EXCO Pembudayaan Inovasi Dr Mohamad Fahmi Ngah dan Datuk Bandar Petaling Jaya Mohamad Azhan Md Amir.

Berlangsung di pusat bandar Seksyen 52 Petaling Jaya, program tersebut mengetengah kepelbagaiannya budaya dan warisan dunia kepada masyarakat.

Selain persembahan kebudayaan, festival itu turut menganjurkan pameran produk kraftangan, persidangan seni, perbincangan meja bulat pengurus bandar raya dan seminar kerjaya.

Jurufoto FIKRI YUSOF dan NUR ADIBAH AHMAD IZAM merakam sebahagian acara berkenaan. Keterangan gambar disediakan oleh HAFIZAN TAIB.



Peserta China dengan tarian mereka dalam persembahan di Dewan Sivik MBPJ pada 23 September



Persembahan joget balfolk dari penari Belanda turut memeriahkan acara di Laman MBPJ pada 24 September



Tarian mempat pasangan dari Filipina yang dikenali salisid menuntut peserta lelaki berpakaian seperti ayam jantan



Mia Insyrah Mohd Harzul (kanan) dari Jabatan Pendidikan Negeri menerangkan mengenai ayam katik kepada pengunjung Aretha Hastama



Penyanyi rock Datuk Awie mempersembahkan lagu terkenal kumpulan Wings, Peronda Jaket Biru, di Laman MBPJ pada 24 September



Mohd Firdaus Abdul Razak melakukan demonstrasi mencanting batik di reruai Perbadanan Kemajuan Kraftangan Malaysia pada 23 September



Persembahan peserta dari Indonesia untuk tetamu dan pengunjung festival di Laman MBPJ pada 24 September

# Marabahaya Maoisme

**B**ermula daripada pertengahan tahun 1958 sehingga pertengahan tahun 1959, China dibelenggu dengan suasana serba tegang dan meluap-luap ini.

Dua tahun selepas daripada itu, China diselubungi pula dengan penipuan dan dilanda kebuluran dan kematian beramai-ramai.

Maoisme yang semakin parah merupakan akar kepada permasalahan ini; penasihat-penasihat kaki bodek dan bacul bersekongkol dalam hal ini.

Mao terlalu yakin dengan kemampuan gerakan massa yang revolucioner dalam mengatasi sebarang halangan, tidak kira dalam hal meningkatkan pengeluaran bijirin atau besi mahupun dalam perkara seperti memerangi musuh yang jauh lebih kuat.

Di China pada penghujung tahun 1950-an, komun telah dibina menerusi gabungan beberapa kolektif. Sebagai suatu unit yang lebih besar, mereka telah membina bangsal bagi pengeluaran tanaman dan bijirin.

## Tidak rasional

Selain daripada itu, selaku industri kecil dan sederhana mereka juga menyediakan barang keperluan bagi kegunaan penduduk setempat.

Kawasan luar bandar tidak lagi perlu bergantung kepada industri bandar bagi mendapatkan barang keperluan mereka; barang keperluan harian yang tidak mempunyai bekalan tinggi seperti berus gigi, baldi, benang pintal dan tali sudahpun dikeluarkan oleh masyarakat setempat.

Ia menyaksikan bagaimana semangat berdikari melonjak kepada semangat mampu diri yang begitu membanggakan.

Gabungan semangat dan keterujaan luar biasa, selain usaha-usaha tidak rasional dan keengganannya Mao mendengar kritikan terhadap dirinya, dasar dan teorinya akhirnya membawa China ke lembah tragis pada tahun 1959.

Pihak berkuasa wilayah dan juga tempatan yang bersungguh-sungguh ingin dilihat sebagai berada di pihak yang benar telah membesar-besarkan maklumat statistik bagi menggambarkan bahawa keuntungan besar telah dicapai dalam pengeluaran besi dan juga bijirin.

Berdasarkan angka-angka palsu ini, mereka masih tidak sedar akan keadaan sebenar di mana tanaman-tanaman dibiar rosak di ladang akibat daripada kekurangan tenaga buruh untuk menuainya.

Kaum wanita dan juga kanak-kanak yang membanting tulang enam belas jam sehari tidak mampu untuk menuai hasil tanaman terbesar

dalam sejarah negara China itu.

Jelas sekali bahawa besi yang dihasilkan di relau kecil-kecilan atau "belakang rumah" tidak berguna sama sekali, namun tiada siapa memiliki keberanian untuk memerintahkan supaya kegiatan ini dihentikan serta-merta.

Sementara itu, tindakan terburu-buru Mao dengan berjanji bahawa pengeluaran besi negara China bakal mengatasi pengeluaran England dalam tempoh lima belas tahun dan kemudiannya mengatasi Amerika dalam tempoh tiga puluh tahun telah mengakibatkan beberapa perkembangan yang aneh.

Pada satu tahap yang sedikit remeh, kebanyakan kanak-kanak China yang lahir pada tahun 1958 dan 1959 telah dinamakan "Chaoying" ("Mengatasi England") atau "Chaomei" ("Mengatasi Amerika").

## Pembaziran tenaga

Apabila Kemaraan Raksasa ditolak keras bertahun-tahun selepas itu, sebilangan daripada demografi ini berasa terpanggil untuk mengubah nama mereka yang kini dilihat memalukan.

Pada tahap yang lebih serius pula, pembinaan relau peleburan besi juga telah digalakkan kepada setiap keluarga dan juga wilayah agar dapat menyumbang kepada sasarannya pengeluaran besi.

Hal ini merupakan suatu pembaziran masa, tenaga dan juga sumber.

**Sebahagian yang cuba untuk menyatakan kebenaran akan dituduh sebagai memiliki pemikiran "borjuis" atau pemikiran haluan kanan**

Bekalan minyak yang sedia tidak cukup akhirnya digunakan untuk membakar relau; peralatan rumah dileburkan bagi mendapatkan bijih besi yang tidak seberapa dan tenaga buruh yang sewajarnya digunakan bagi menuai hasil tanaman yang banyak telah dirampas oleh rancangan ini.

Apatah lagi, jongkong-jongkong besi yang dihasilkan oleh relau-relau ini sebenarnya tidak berguna sama sekali.

Kebuluran semakin menghampiri penduduk di ladang. Bahkan di kawasan yang dianggap istimewa seperti Zhongnanhai, kekurangan daging dan sayur-sayuran mulai dirasai.

Pihak ketenteraan, golongan yang sering mendapat bekalan makanan terbaik selain

pimpinan Parti juga akhirnya terpaksa mengikat perut dan menggantikan beras dengan bijirin kasar.

Penduduk di bandar juga sukar untuk mendapatkan bekalan makanan dan terpaksa melaksanakan catuan makanan bagi memastikan keperluan asas setiap keluarga terjaga.

Kerapkali, bekalan makanan tidak mencukupi sehingga bayi-bayi generasi Kemaraan Raksasa ini selalunya terbantut secara jasmani disebabkan kekurangan zat.

## Mati kebuluran

Kawasan luar bandar paling teruk terjejas dan sebarang bijirin yang ada akan dituntut bagi diaghikan untuk kegunaan bandar.

Hal ini mengakibatkan mereka terkapai-kapai tanpa bantuan dan bergantung sepenuhnya pada diri mereka sendiri.

Akhirnya, mereka mati kebuluran. Pemimpin tempatan terlalu takut untuk memberitahu pihak berkuasa pusat tentang kedahsyatan penderitaan yang sebenar. Lagi pula, mereka telah melaporkan hasil tanaman yang banyak.

Sebahagian yang cuba untuk menyatakan kebenaran akan dituduh sebagai memiliki pemikiran "borjuis" atau pemikiran haluan kanan. Ramai yang menikus dan hanya mampu berdoa agar mereka terselamat daripada ancaman kebuluran dan politik. Akibatnya, semakin ramai terkorban.

Peristiwa kebuluran pada tahun 1959-61 begitu dahsyat sekali. Statistik yang boleh dipercayai susah untuk ditemui. Begitupun, kebanyakan daripada mereka mengandaikan bahawa angka kematian pada ketika itu mencecah lima belas sehingga dua puluh juta orang.

Sebahagian besar daripada mereka ialah golongan masyarakat tani terutamanya dalam kalangan orang tua, muda dan wanita yang lebih mudah terdedah kepada sebarang marabahaya.


Penduduk-penduduk bandar tidak menyaksikan dengan mata kepala mereka bagaimana mayat bergelimpangan di kawasan luar bandar. Pelarian dari kawasan luar bandar telah disekat daripada memasuki kawasan bandar.

Hal ini tidak dilaporkan di mana-manapun. Pelarian yang berjaya melarikan diri ke Hong Kong telah menyedarkan pihak pemerhati China Barat tentang situasi tersebut.

Sungguhpun begitu, mereka hanya mampu melaporkan hal yang berlaku di kawasan setempat mereka dan tidak mempunyai maklumat sebenar tentang skala malapetaka yang melanda China pada ketika itu.

Hanya pada tahun 1980-an, selepas beberapa pengenduran rasmi perihal pengharaman menilai semula zaman Mao, barulah kadar kedahsyatan peristiwa kebuluran tersebut diketahui oleh dunia dan rakyat China.

*Petikan muka surat 136-144 buku Mao Zedong: China dalam dunia Abad ke-20, terjemahan Mao Zedong and China in the Twentieth-Century World tulisan Rebecca E. Karl. Ia boleh dibeli melalui bukuibde.com atau di toko Rencana, Bandar Sri Damansara, Petaling Jaya.*





# Rezeki tanaman hiasan

Oleh NAZLI IBRAHIM  
Foto NUR ADIBAH AHMAD IZAM

**K**amal Shafiee tidak menyangka pokok keladi yang merimbun di rumahnya di Kampung Batu 23 Sungai Nibong, Sekinchan mengubah kehidupan keluarganya sama sekali.

Minat terhadap tumbuhan itu sedikit sebanyak membantu memajukan perniagaan tanaman hiasan yang dimulakan lelaki berusia 41 tahun itu sejak Mac 2020.

Apatah lagi, pelaksanaan Perintah Kawalan Pergerakan (PKP) pada masa itu melonjakkan permintaan ramai. Ditambah pula, rakaman penanaman pokok keladi tular di media sosial.

Bapa enam anak tidak lagi perlu meminta-minta beras jiran untuk makanan sekeluarga. Selama ini, bukan sekali dua mereka makan jemput-jemput kosong bagi mengalas perut.

Dengan jualan pokok keladi yang laris, ada kalanya mencécah RM1,000 sehari, Kamal keluar dari belenggu kemiskinan sekali gus beliau diisytihar bukan asnaf setahun kemudian.

Sebelum PKP, beliau runting kerana tidak bekerja. Namun, kedatangan jiran yang membeli pokok keladi pada harga RM50 mencetuskan ilham. Beliau tekad menjadi pengusaha tanaman hiasan.

Hasil bantuan rakan, anak jati Rawang, Hulu Selangor itu memperoleh benih beberapa jenis pokok bunga untuk disemai. Maka lahirlah perniagaan Tinat Nurseri di halaman rumahnya.

Meski jualan perlahan pada bulan pertama,

perniagaannya berkembang apabila ada pembekal meletak pelbagai tanaman hiasan termasuk keladi yang dijual antara RM15 hingga RM250 di rumahnya.

Beliau juga menjual dalam talian dan menawar perkhidmatan penghantaran kepada pelanggan sekitar Sekinchan.

Keuntungan pula digunakan untuk mempelbagai jenis tanaman. Kurang setahun, jualannya meningkat sehingga ada waktunya mencecah RM1,000 sehari.

“Masa itu pokok keladi tular. Ramai tanam sebagai hobi. Agaknya bosan sebab terperap lama dalam rumah,” katanya ketika ditemui Selangorkini pada 24 Oktober.

Selain pelbagai jenis keladi, pokok bunga kertas dan tanah kompos antara paling laris. Memang Kamal tahu serba-serbi tanaman lantaran bekerja sebagai tukang kebun sekolah sejak 2016.

## Beras ihsan jiran

Sebelum memulakan perniagaan itu, Kamal hanya memperoleh RM900 sebulan. Beliau terpaksa membuat bermacam-macam kerja sambilan bagi menambah pendapatan. Menebas kebun, memotong rumput dan menanam pokok. Beliau juga mencari pucuk paku dan pelbagai sayur untuk dijual.

Isterinya Aatina Muhammad, 41, hanya suri rumah. Dapur tidak berasap lumrah buat keluarganya. Jika kehabisan tepung untuk masak jemput-jemput, beliau menebalkan muka meminta beras jiran.

Mujurlah kepayaan Kamal sekeluarga mendapat perhatian Lembaga Zakat Selangor (LZS). Sejak 2017, badan itu membantu membayar sewa rumah, biaya persekolahan dan persiapan raya.

Berikutnya perniagaan mendapat sambutan, beliau mendapat bantuan RM3,000 daripada Teraju Ekonomi Asnaf Sdn Bhd (Teras) pada 2020 dan 2021. Anak syarikat Majlis Agama Islam Selangor itu menguruskan pembangunan dan latihan keusahawanan kepada asnaf seliaan LZS seperti Kamal.

Sebanyak RM10,000 daripada keuntungan dan bantuan itu digunakan untuk mengubah suai tapak niaga selain membeli peralatan, membina pangkin besi bertingkat dan jaring pelindung matahari.

Namun, Kamal tidak terkecuali berdepan cabaran. Beliau pernah rugi RM3,000 apabila hampir 1,000 anak pokok bunga kertas, kaktus, petunia, kembang cina yang ditanam dalam polibeg mati akibat hujan berterusan pada musim tengkujuh.

Beliau juga kerugian hampir RM2,000 apabila pelanggan membatal tempahan anak pokok kelapa spesies tacunan yang berasal dari Thailand. Semua itu dihadapi dengan penuh kesabaran.

Kehidupannya kini jauh lebih baik berbanding sebelum berniaga. Kini, Kamal mampu menyara keluarga walau jualan tidak serancak seperti tempoh PKP. Dia masih berupaya meraih kira-kira RM200 sehari dan RM500 pada hujung minggu.

**Ketua pengarang:**  
**Fazallah Pit**  
**fazallah@mediaselangor.com**

**Pengarang berita:**  
**Afeeqa Abdul Rasol**  
**afeeqa@mediaselangor.com**

**Penolong pengarang akbar:**  
**Afix Redzuan**  
**Faridzwan Abdul Ghafar**

**Pemangku ketua wartawan:**  
**Nadiah Zamlus**  
**sitinadiah@mediaselangor.com**

**Jurufoto kanan:**  
**Hafiz Othman**

**Ketua artis grafik:**  
**Azwa Malek**  
**Editorial: info@mediaselangor.com**  
**Iklan: sales@mediaselangor.com**  
**Pemasaran: marketing@mediaselangor.com**

**SelangorTV:**  
**Marniza Othman**  
**marniza@mediaselangor.com**  
**Ameen Azizul**  
**ameen@mediaselangor.com**

**Pemasaran dan Pengiklanan:**  
**Suziana Zulkifli**  
**suziana@mediaselangor.com**

**Pengedaran:**  
**Adzhar Maludin**  
**adzharmaludin@mediaselangor.com**

**MediaSelangor**  
Media Selangor Sdn Bhd,  
Aras 11 Menara Bank Rakyat,  
No 1 Jalan Indah 14/8, Seksyen 14,  
40000 Shah Alam, Selangor  
Tel: 03-5523 4856 Fax: 03-5523 6856

# Perangi miskin tegar

Oleh NADIAH ZAMLUS

**D**atuk Seri Anwar Ibrahim bertekad mahu menontahkan miskin tegar pada hujung tahun ini, meski hanya berbaki dua bulan sebelum memasuki 2024.

Perdana menteri menyuarakan rasa positif usaha itu akan tercapai berdasarkan data terkini yang menyaksikan kadar kemiskinan tegar terus mencatat penurunan.

Setakat 15 Mac lalu, 123,243 ketua isi rumah miskin tegar sudah dapat dikenal pasti kerajaan untuk dibantu, kata perdana menteri di parlimen pada 28 Mac.

Ketua Perangkawan Datuk Seri Dr Mohd Uzir Mahidin pada 29 Julai pula dilapor berkata, dalam laporan Survei Pendapatan dan Perbelanjaan Isi Rumah 2022, bilangan isi rumah miskin tegar berpendapatan bawah RM1,198 menurun kepada 0.2 peratus (18,445 isi rumah) berbanding 0.4 peratus pada 2019.

Miskin tegar bermaksud isi rumah mempunyai pendapatan bulanan kurang daripada Pendapatan Garis Kemiskinan (PGK) makanan.

PGK negara pada 2022 sebanyak RM2,589 berbanding RM2,208 pada 2019. Sementara nilai PGK makanan pula RM1,198 (2019: RM1,169).

Bagi mencapai sifar miskin tegar, kerajaan melancarkan Inisiatif Pendapatan Rakyat (IPR) pada 26 Februari. Langkah itu berupaya menjana pendapatan sekurang-kurangnya RM2,000 sebulan, kata Menteri Ekonomi Rafizi Ramli semasa peluncuran inisiatif itu.

IPR merangkumi tiga model iaitu Inisiatif

Usahawan Tani (Intan), Inisiatif Usahawan Makanan (Insan) dan Inisiatif Operator Perkhidmatan (Ikhsan).

Sejak itu, IPR berjaya meningkatkan pendapatan bulanan lebih 2,000 peserta terlibat. Peserta program Insan misalnya, meraih hasil jualan purata sehingga RM14,000 sebulan.

"Tahun hadapan, RM500 juta disediakan untuk meningkatkan penyertaan lebih ramai rakyat miskin tegar mengikuti program IPR bagi menambah pendapatan mereka," kata perdana menteri semasa membentangkan belanjawan pada 13 Oktober.

Pakar ekonomi, Prof Emeritus Dr Barjoyai Bardai menyifatkan hasrat perdana menteri itu sebenarnya mampu dicapai. Syaratnya, kerajaan perlu berusaha lebih gigih.

## Budaya usahawan

Pensyarah Universiti Tun Abdul Razak itu menegaskan, peserta IPR memerlukan masa sekurang-kurangnya tiga tahun untuk keluar kepompong miskin tegar.

Kumpulan berkenaan juga memerlukan masa untuk menjalani kehidupan seperti orang biasa, terutamanya hidup berdikari tanpa bantuan.

Dalam perkembangan sama, Dr Barjoyai mengakui perniagaan dari rumah antara kaedah berkesan membasmikan kemiskinan tegar. Platform niaga dalam talian harus dimanfaatkan kerana ia paling mudah dilaksana.



Menerusnya, budaya keusahawanan meliputi kawasan luar bandar boleh dipupuk. Ia termasuk melatih anggota masyarakat mewujudkan perniagaan di setiap rumah.

"Tidak kisahlah pertanian, perkhidmatan atau makanan. Lama-kelamaan akan jadi budaya dan berkembang," katanya kepada Selangorkini pada 27 Oktober.

Bagaimanapun, penganalisis ekonomi berpengalaman selama 5 dekad itu tidak bersetuju dengan pemberian tunai bagi menghapuskan miskin tegar.

Kaedah itu tidak menyelesaikan masalah kerana ia menyebabkan kumpulan sasar akan terus bergantung bantuan tunai kerajaan.

"Skim jangka pendek ini secara psikologinya dapat membantu kumpulan pendapatan B40 tetapi kesan dari segi materialnya sangat kecil," katanya.

Dr Barjoyai turut menegaskan pangkalan data perlu dikemaskini lebih rapi bertujuan membantu menaik taraf status keluarga miskin tegar.

"Pangkalan yang sangat terperinci siapa yang memerlukan bantuan harus ada. Pengelasan sedia ada terlalu umum sehingga ramai yang terima dua hingga tiga bantuan namun yang sepatutnya terima tidak ada dalam rekod," katanya.

Jelasnya, walau miskin tegar terhapus, kemiskinan relatif tetap akan berlaku. Mengikut perspektif ekonomi, miskin relatif berlaku apabila meningkatnya taraf hidup mengikut pertumbuhan ekonomi.

## Sengsara 12 juta orang, tragedi 100 tahun Palestin

### ◀ DARI MUKA 10

**1993** Perjanjian sulit di Oslo, Norway antara Israel dengan PLO pada 13 September bagi membenarkan penubuhan Pihak Berkuasa Palestin di Gaza dan Tebing Barat. Intifadah pertama berakhir.

**1995** Susulan perjanjian ini, pada 28 September, Tebing Barat dibahagi kepada tiga kawasan: 60 peratus dikuasai Israel (zon C), 22 peratus ditadbir bersama (B) dan 18 peratus dikawal Palestin (A).

**2000** Intifadah kedua digerakkan pada 28 September sebagai membantah lawatan bekas jeneral Ariel Sharon ke Haram al-Sharif. Warga Palestin curiga lawatan ini sebahagian taktik menguasai tempat suci umat Islam tersebut.

**2002** Israel mendirikan tembok pemisah tinggi di Tebing Barat pada 23 Jun bagi menjamin keselamatannya. Tembok ini memisahkan kawasan tradisi termasuk Jerusalem dan banyak keluarga Palestin.

Projek membina pagar elektrik dan tembok konkrit di sempadan Gaza bermula sejak 1995.

**2004** Apabila tokoh utama PLO Yasser Arafat

meninggal dunia pada 11 November, Intifadah berakhir.

Setahun kemudian, 9,000 pendatang Israel dan tenteranya berundur dari Gaza.

**2006** Hamas menang pilihan raya pada 25 Januari bagi melantik anggota majlis perundangan Pihak Berkuasa Palestin.

Gerakan ini menang 74 daripada 132 kerusi, manakala Fatah meraih 45 kerusi.

Namun, kemenangan ini bertukar konflik baharu apabila tentera Israel menyusup ke Gaza dan melancarkan serangan tengah malam 28 Jun.

Esoknya, negara itu menahan lapan menteri Hamas dan 26 anggota majlis perundangan di Tebing Barat.

Sehingga Ogos, Israel menahan 49 pegawai kanan Hamas, semuanya dari Tebing Barat, termasuk 33 anggota parliment dengan alasan gerakan itu "pengganas".

**2007** Walau Hamas menang besar, Fatah berperang dengan gerakan ini yang menyebabkan banyak nyawa terkorban.

Hamas berjaya menolak keluar pencabarannya dalam perang saudara.

Susulan itu, Israel menguatkan sekatan udara, laut dan darat terhadap Gaza. Sekatan negara ini bersama Mesir bermula sejak 2005, tidak lama

selepas berundur.

Dengan penduduk 2.3 juta di atas tanah 365 km persegi, Gaza dianggap "penjara terbuka" di kawasan antara paling padat di dunia!

Israel melancar empat serangan besar terhadap wilayah ini: 2008, 2012, 2014 dan 2021. Ribuan penduduk Gaza terbunuh dan ribuan bangunan runtuh.

Pada 2014 sahaja, serangan mengorbankan 2,100 termasuk hampir 500 kanak-kanak. Seramai 11,000 cedera dan 20,000 rumah ranap.

**2023** Hamas lancar serangan mengejut melalui darat dan udara pada 7 Oktober. Israel melancarkan serangan balas bertubi-tubi termasuk penaklukan darat di utara Gaza.

Setakat petang 31 Oktober, 8,525 orang termasuk 3,542 kanak-kanak dan 2,187 wanita terbunuh.

Lebih 21,000 termasuk 6,300 kanak-kanak cedera, sementara ribuan lagi hilang bawah runtuhan bangunan. Lebih 1,400 orang terbunuh dan 5,400 lagi cedera di Israel.

Jutaan orang berdemonstrasi di bandar-bandar utama dunia bagi membantah serangan di Gaza.

Bagi aktivis Palestin, slogan pembebasan mereka tetap "dari sungai (Jordan) hingga laut (Tengah), Palestin pasti merdeka."



**CERIA...** Perdana Menteri Datuk Seri Anwar Ibrahim meneliti buku 'Anwar Triumphs' selepas pelancaran di Pusat Konvensyen Kuala Lumpur pada 29 Oktober. Turut hadir isterinya Datuk Seri Dr Wan Azizah Wan Ismail dan penulis Mark Trowell KC (kiri). Foto Bernama

Desak henti serangan di Gaza

# Bincang isu Palestin dengan negara OIC

**SHAH ALAM** - Malaysia sepakat dengan Pertubuhan Kerjasama Islam (OIC) dan Liga Arab untuk mendesak supaya serangan rejim Israel terhadap penduduk Palestin dihenti segera.

Perdana Menteri Datuk Seri Anwar Ibrahim berkata mereka mengadakan rundingan setiap hari bagi meneliti perkembangan semasa konflik rejim Israel terhadap Palestin.

"Itu keutamaan negara-negara Islam! Teruskan solidariti dan sokongan tidak berbelah-bahagi kepada Palestin!" ka-

tanya di Facebook pada 31 Oktober.

Beliau juga mengarahkan Menteri Luar Datuk Seri Dr Zambry Abdul Kadir menghubungi Turkiye dan Arab Saudi untuk menyatakan kewajaran mengadakan sidang tergempar (OIC), lapor Bernama.

"Sidang ini juga harus melibatkan negara-negara seperti Brazil, Rusia dan China yang menyatakan sikap tegas menentang keganasan Israel," katanya.

Terdahulu, Perdana Menteri di Dewan Rakyat menyatakan sokongan Malaysia

terhadap cadangan Turkiye dan Arab Saudi untuk mengadakan mesyuarat OIC bagi membincangkan isu Palestin.

Duta Besar Turkiye ke Malaysia Emir Salim Yuksel pula berkata republik itu menjalin kerjasama erat dengan negara ini dalam isu Palestin termasuk berkaitan bantuan kemanusiaan ke Gaza.

Beliau menambah perkara berkenaan turut dibincang Presiden Recep Tayyip Erdogan dan Anwar semasa lawatan dua hari perdana menteri ke Turkiye pada 21 Oktober.

## Atasi 301 projek terbengkalai

**SHAH ALAM** - Sebanyak 301 projek perumahan sakit dan terbengkalai diatasi setakat 30 September, kata Timbalan Menteri Pembangunan Kerajaan Tempatan Akmal Nasrullah Mohd Nasir.

Beliau menjelaskan jumlah berkenaan melibatkan 38,752 unit rumah di seluruh negara dengan nilai pembangunan kasar (GDV) sebanyak RM28.88 bilion, lapor Bernama.

"Pelbagai langkah dilaksanakan kementerian bagi menjelaskan projek-projek perumahan swasta lewat, sakit dan

terbengkalai secara komprehensif dan menyeluruh.

"Usaha kementerian dilaksana dengan lebih terperinci supaya tindakan penyelesaian adalah lebih besar dan berfokus," katanya di Dewan Rakyat pada 30 Oktober.

Menjawab soalan R Yuneswaran (Pakatan Harapan-Segamat), Akmal berkata pasukan khas Projek Perumahan Swasta Sakit dan Terbengkalai membantu menyelesaikan masalah projek sedemikian.

Beliau menambah kementerian

bekerjasama dengan kerajaan negeri, pihak berkuasa tanah, pihak berkuasa tempatan, bank dan persatuan pembeli bagi memastikan masalah itu tidak berulang.

Pada Jun, Kementerian Pembangunan Kerajaan Tempatan mengenal pasti 481 projek perumahan sakit dan 112 projek terbengkalai di seluruh negara.

Kelantan antara negeri merekod peratusan tertinggi projek perumahan swasta yang tidak mengikut perancangan iaitu 40 projek sakit dan tiga lewat.

## Elak kes tipu derma untuk warga Gaza

**SHAH ALAM** - Orang ramai diingatkan supaya tidak terperdaya dengan pihak tertentu yang menyamar sebagai badan bukan kerajaan (NGO) mengutip sumbangan untuk rakyat Palestin.

Menteri Komunikasi dan Digital Fahmi Fadil berkata rakyat perlu berhati-hati dalam menyalur sumbangan agar tidak tertipu sekalipun terkesan dengan situasi di Palestin, lapor Bernama.

"Hati-hati dengan scammer (penipu) yang cuba mengambil kesempatan, kadang-kadang mereka letak gambar Masjid Al-Aqsa, kanak-kanak Palestin tetapi scammer."

"Gunakan saluran rasmi dan rujuk kepada pihak berkuasa untuk mengesahkan sama ada tabung itu betul atau tidak," katanya pada sesi temu bual bersama radio Sabahfm pada 30 Oktober.

## Guna bahasa Melayu di agensi kerajaan

**SHAH ALAM** - Perdana Menteri Datuk Seri Anwar Ibrahim mengingatkan jabatan kerajaan supaya tidak melayan surat yang menggunakan selain bahasa kebangsaan iaitu bahasa Melayu.

Beliau kesal berikutan ada pihak seiring kali cuba meninggalkan aras Perlembagaan Persekutuan untuk berurusan dengan jabatan kerajaan dalam bahasa kebangsaan, lapor Bernama.

"Kalau dalam kalangan syarikat dan universiti tempatan termasuk swasta, arahannya ialah siapa menulis dalam bahasa selain bahasa kebangsaan, surat itu akan dipulangkan," katanya.

Berucap dalam Karnival Dekad Bahasa Kebangsaan dan Dekad Membaca Kebangsaan pada 25 Oktober, Anwar menegaskan tindakan itu tidak bermakna kerajaan meremehkan penguasaan bahasa Inggeris.

## Kad diskau peniaga Menu Rahmah

**SHAH ALAM** - Kad diskau khas untuk peniaga Menu Rahmah diperkenal mulai 2 November untuk peniaga menikmati potongan harga pembelian bahan mentah melibatkan enam pasar raya terpilih.

Pemangku Menteri Perdagangan Dalam Negeri dan Kos Sara Hidup Datuk Armizan Mohd Ali berkata inisiatif itu hasil kerjasama kementerian itu dengan pasar raya berkenaan, lapor Bernama.

"Ia sebagai tanda penghargaan buat peniaga yang menyokong usaha kerajaan melalui Menu Rahmah," katanya ketika menggulung perbahasan Belanjawan 2024 pada 1 November.

Beliau menambah program Jualan Rahmah pula akan diperkasa bagi membantu golongan berpendapatan rendah sekurang-kurangnya dua kali sebulan di setiap Parlimen seluruh negara.

## Peruntukan TVET lahir pekerja mahir

**SHAH ALAM** - Ahli parlimen Gombak berharap peruntukan RM6.8 bilion dalam Belanjawan 2024 untuk program pendidikan, latihan teknikal dan Vokasional (TVET) diberi tumpuan untuk melahirkan lebih ramai pekerja berkemahiran dan berpendapatan tinggi.

Dato' Seri Amirudin Shari berkata ia bagi menjayakan Pelan Induk Perindustrian Baharu (NIMP) 2030 untuk memacu sektor berdampak tinggi seperti elektrik dan elektronik (E&E), kendaraan elektrik serta aeroangkasa.

"Bidang seperti aeroangkasa, farmaseutikal, makanan dan minuman serta peralatan perubatan melatari sektor pembuatan Selangor," katanya pada 26 Oktober.

## Selesai baiki jalan dalam 30 hari

**SHAH ALAM** - Sebanyak 676 aduan jalan raya diselesaikan dalam tempoh satu hingga 30 hari manakala 236 lagi dalam tindakan, kata Menteri Kerja Raya Datuk Seri Alexander Nanta Linggi.

Katanya, 912 daripada 3,403 aduan antara 1 Ogos hingga 23 Oktober melibatkan laluan kendalian agensi kementerian berkenaan manakala 2,491 lagi jalan negeri dan pihak berkuasa tempatan.

Beliau menambah sebanyak 275 aduan pula isu jalan berlubang, lampu jalan (187 aduan), laluan rosak (174 aduan), lampu isyarat (98 aduan) dan garisan jalan (64 aduan), lapor Bernama.

Menurutnya, 49 aduan lagi melalui aplikasi MYJalan berkaitan halangan, papan tanda (23 aduan), kemudahan awam (21 aduan), perabot jalan (16 aduan) dan tanah runtuh (lima aduan).

Aplikasi itu diperkenalkan pada 1 Ogos bagi memudahkan pengguna jalan raya membuat aduan kerosakan jalan raya.

## 90 peratus rakyat guna nirtunai

**SHAH ALAM** - Selangor dan Pulau Pinang mencapai 90 peratus penembusan bayaran digital setakat Oktober, kata pengarah kanan Bahagian Digitalisasi Kerajaan Payments Network Malaysia Sdn Bhd (PayNet).

Firdaus Ghani menambah kadar penembusan di Kedah pula mencapai 80 peratus, Perlis lebih 60 peratus, Johor lebih 50 peratus dan Perak kira-kira 49 peratus, lapor Bernama.

"Pencapaian Selangor dan Pulau

Pinang hasil kerjasama pengurusan tertinggi negeri yang menggalakkan bayaran nirtunai bertujuan mengurangkan ketirisian dan meningkatkan hasil kerajaan," katanya.

Beliau berkata demikian ketika ditemui selepas majlis penyampaian hadiah kempen 'Cashless Boleh 3.0' dan program bual bicara berkenaan bayaran digital pada 30 Oktober.

Kempen itu bertujuan menggalakkan tabiat nirtunai sebagai kaedah utama se-

lain membantu agensi kerajaan dan pihak berkuasa tempatan (PBT) beralih kepada penggunaan 100 peratus tanpa tunai.

PayNet adalah rangkaian pembayar infrastruktur berpusat bagi pasaran kewangan terulung di Malaysia dan mengendalikan kemudahan bayaran digital seperti DuitNow, DuitNow QR dan JomPay.

PayNet dimiliki Bank Negara Malaysia (BNM) dan konsortium yang terdiri 11 bank tempatan.

## 40 peratus bawah RM5,000 sebulan

# Tingkat peluang kerja gaji tinggi

Oleh **FITRI HAZIM HAZAM**

**SHAH ALAM** - Peluang pekerjaan dengan gaji lebih baik khususnya dalam bidang teknikal dan vokasional perlu diwujudkan untuk mempertingkat taraf hidup rakyat.

Ahli Parlimen Gombak Dato' Seri Amirudin Shari menjelaskan ia bagi memenuhi sasaran gaji median bawah Pelan Induk Perindustrian Baharu (NIMP) 2030 berjumlah RM4,510 menjelang 2030.

Beliau berkata terdapat jurang gaji di seluruh negara berdasarkan Lapo-

ran Tinjauan Pendapatan Jabatan Perangkaan 2022 iaitu 11.5 peratus isi rumah berpendapatan RM16,000 dan ke atas.

"Ini bermakna 89.5 peratus keluarga mempunyai gaji lebih rendah daripada itu. Daripada peratusan ini, hampir 40 peratus isi rumah berpendapatan bawah RM5,000 sebulan.

"Ini menunjukkan antara punca kebimbangan utama rakyat ialah persepsi ekonomi meminggirkan mereka dan tidak menawarkan peluang untuk meningkatkan mutu hidup," katanya pada 26 Oktober.

Dalam perbahasan di Dewan Rakyat itu, Amirudin menambah isu pekerjaan yang menawarkan gaji berpatutan belum diatasi lagi meskipun kadar pengangguran turun kepada tiga peratus.

"Beberapa hari lalu, Kerajaan Negeri menerima pandangan Menteri Pelaburan, Perdagangan dan Industri bahawa produktiviti pekerja telah menurun.

"Kadar produktiviti berkait rapat dengan kadar upah walaupun kita mencipta banyak peluang pekerjaan tetapi ia tidak mampu untuk memberi gaji tinggi," katanya.

## Cadang kongsi sumber tenaga

**SHAH ALAM** - Ahli parlimen Gombak mencadangkan sumber tenaga yang dikuasai Tenaga Nasional Berhad (TNB) turut dikongsi pemain industri dalam menjayakan projek kepentingan awam.

Dato' Seri Amirudin Shari menjelaskan pendekatan berkenaan perlu mengambil kira penggunaan tenaga untuk menyokong pembinaan stesen pengecasan kendaraan elektrik (EV) di sebuah negeri.

"Bercakap soal EV, kita perlu sediakan tempat pengecasan dan memerlukan sub stesen oleh TNB. Adakah kita bersedia dengan jumlah tenaga mencukupi untuk pembinaan sub stesen ini?

"Saya mencadangkan untuk menilai kaedah di negara lain dengan monopoli tenaga tidak diberi kepada satu pihak sahaja. Mungkin pandangan ini kurang popular bagi sesetengah pihak."

"Tetapi negara lain membenarkan pasaran tenaga dibuka dengan kawalan yang memberi peluang pemain industri membekal tenaga yang cukup," katanya di Parlimen pada 26 Oktober.

Justeru, Amirudin yang juga Dato' Menteri Besar meminta Suruhanjaya Tenaga Malaysia dan menterian berkaitan untuk menyediakan unjuran

keperluan tenaga untuk setiap negeri.

"Ini membolehkan Kerajaan Negeri menyusun kadar pembangunan urbanisasi, perindustrian dan lokaliti tertentu," katanya.

Beliau juga menambah projek pengangkutan awam termasuk Laluan Rel Pantai Timur (ECRL) dan Transit Aliran Ringan 3 (LRT3) dijangka meningkatkan permintaan tenaga sedia ada.

Sebelum ini, Kerajaan Negeri memperuntuk tanah seluas 758.47 hektar untuk pembinaan laluan ECRL membabitkan daerah Gombak, Klang, Kuala Selangor dan Hulu Selangor.

Laluan sepanjang 90.27 kilometer (km) itu membabitkan jajaran bertingkat sepanjang 27.84km, aras tanah sepanjang 33.93km dan terowong sepanjang 28.5km.

Sementara itu, perkhidmatan LRT3 bagi jajaran Petaling Jaya, Shah Alam dan Klang yang menerusi belanja sehingga RM16 bilion dijangka mulai beroperasi pada 1 Mac 2025.

Kemudahan itu diunjur dapat dimanfaatkan lebih dua juta penduduk di sepanjang jajaran dengan 20 stesen dan mampu membawa sehingga 18,630 orang penumpang bagi setiap jam.



### NOTIS PEMBERITAHUAN KALI KEDUA

Penyediaan Asas Rujukan Rancangan Tempatan Subang Jaya 2035 (Pengubahan) adalah untuk membuat semakan dan pengubahan ke atas sebahagian pernyataan bertulis, pelan guna tanah dan jadual klasifikasi kegunaan tanah, serta cadangan projek pembangunan Selangor Maritime Gateway (SMG).

Majlis Bandaraya Subang Jaya dengan ini sekali lagi menjemput pemunya tanah di kawasan Bandaraya Subang Jaya untuk mengemukakan cadangan-cadangan kepada Penyediaan Asas Rujukan Rancangan Tempatan Subang Jaya 2035 (Pengubahan).

Cadangan-cadangan hendaklah dihantar secara rasmi kepada Majlis Bandaraya Subang Jaya sebelum atau pada 30 November 2023 ke alamat seperti berikut:

#### DATUK BANDAR

Majlis Bandaraya Subang Jaya,  
Persiaran Perpaduan, USJ 5,  
47610 Subang Jaya,  
Selangor Darul Ehsan.  
(u.p: Pengarah Perancang Bandar)

Tel : 03-8026 4425 / 03-8026 3226

Faks : 03-8024 0829

Emel : rtsj2035.pengubahan@mbsj.gov.my

Web : www.mbsj.gov.my



**GEMBIRA...** Zarul Fikri Kamal (empat, kanan) menjuarai pertandingan memancing sempena sambutan ulang tahun bandar raya Shah Alam ke-23 di Taman Tasik Shah Alam pada 29 Oktober. Hadiah disampaikan Ahli Majlis Bandaraya Shah Alam Shakir Ameer Mohideen (tiga kanan). Foto Bahagian Korporat dan Perhubungan Awam MBSA

Mudahkan 20,000 peniaga

# Sedia lapan kios cetak lesen

Oleh SHEEDA FATHIL

**SHAH ALAM** - Majlis Bandaraya Petaling Jaya (MBPJ) menempatkan lapan kios kemudahan cetakan lesen perniagaan bagi memudahkan peniaga sekitar.

Timbalan datuk bandarnya berkata inisiatif itu memanfaatkan kira-kira 21,370 pemegang lesen tred perniagaan dan perindustrian yang tidak berkaitan pembaharuan Kebenaran Merancang.

"Kemudahan mesin ini dapat membantu peniaga untuk mengatur sendiri



masa mereka tanpa perlu beratur panjang dan hanya pergi ke kios disediakan bagi mencetak lesen.

"Kita berharap dengan inisiatif ini semua rungutan mereka perlu menunggu lama untuk mendapatkan cetakan lesen sebelum ini dapat dikurangkan," kata Aznan Hassan pada 26 Oktober.

Selain cetakan lesen, kios berkenaan turut menyediakan kemudahan seperti bahan cukai taksiran, kompaun, tempahan dewan, bayaran bil dan bayaran lesen MJPJ.

Lapan lokasi kios tersebut seperti berikut:

- Lobi ibu pejabat MBPJ – (7.30 pagi – 9 malam)
- Lobi Menara MBPJ – (7.30 pagi – 9 malam)
- Kaunter Pandulalu – (8 pagi – 4 petang)
- Lobi Pejabat Cawangan Kota Damansara – (8 pagi – 4 petang)
- Pasar Jalan Othman – (7.30 pagi – 9 malam)
- Pasar Taman Megah – (7.30 pagi – 9 malam)
- Pasar PJKit SD5 – (7.30 pagi – 9 malam)
- Gerai Makan SS22 Atria – (7.30 pagi – 9 malam)

# Larang cat parkir tanpa kebenaran

**PETALING JAYA** - Majlis Bandaraya Petaling Jaya (MBPJ) akan membatalan lesen niaga pemilik premis yang didapati mengecat petak parkir tanpa kebenaran.

Timbalan Datuk Bandar Aznan Hassan berkata tindakan itu diambil jika mereka didapati bersalah memalsukan petak letak kenderaan.

"MBPJ mempunyai rekod berkenaan tempat letak kenderaan yang sah di

premis perniagaan di sekitar Petaling Jaya.

"Semua pemilik premis perniagaan sama ada yang mempunyai petak khas tempat letak kenderaan sah atau sebaliknya diminta tidak mengecat sendiri kotak tersebut."

"Jika didapati bersalah memalsukan kotak tempat letak kereta ini boleh dikenakan tindakan seperti lesen perniagaan dibatalkan," katanya pada 26

Oktober.

Aznan menggesa peniaga mematuhi peraturan serta tidak menyalahgunakan lot tempat letak kenderaan di premis perniagaan masing-masing.

Sebelum ini, MJPJ membatalan lesen perniagaan sebuah syarikat kerana gagal mengemukakan maklum balas terhadap notis penjelasan mengecat petak khas tanpa kebenaran.

# Kompaun parkir RM10 bulan ini

**HULU LANGAT** - Majlis Perbandaran Kangar (MPK) menawarkan bayaran kompaun parkir RM10 sepanjang November.

Pemangku Yang Dipertua Mohd Fariz Mohd Ariss@Mohd Hatta berharap bayaran serendah itu menggalakkan orang ramai menyelesaikan denda tertunggak.

"Cara pembayaran yang mudah boleh dilakukan di semua kaunter hasil di Menara MPK, cawangan Bandar Tun Hussein Onn, Hentian Kangar dan Ecohill Semenyih.

"Pembayaran juga boleh dibuat di kaunter hasil bergerak atau melalui kios pembayaran. Semakan dan bayaran dalam talian juga boleh dilakukan melalui aplikasi FlexiParking dan Smart Selangor Parking," katanya pada 25 Oktober.

# Aplikasi tebus mata ganjaran

**SHAH ALAM** - Majlis Bandaraya Shah Alam (MBSA) pihak berkuasa tempatan pertama di negara ini yang melancarkan program tebus mata ganjaran bersama masyarakat.

Pemangku Datuk Bandar Ir Cheremi Tarman berkata sistem E-Loyalty menerusi aplikasi MyMBSA menawarkan cenderamata istimewa yang boleh ditebus berdasarkan jumlah mata terkumpul.

"Ini inisiatif kami untuk menghargai masyarakat yang sentiasa hadir ke program-program anjuran MBSA serta menggunakan perkhidmatan kami.

"Mata ganjaran akan diberi kepada orang ramai berdasarkan jenis majlis yang dihadiri. Manakala ganjaran bagi pembayaran cukai, permit atau bil-bil lain adalah RM1 untuk satu mata," katanya pada 24 Oktober.

Menurut Cheremi, aplikasi MyMBSA boleh dimuat turun melalui Apple Store serta Google Play Store, dan 50 mata ganjaran diberi automatik selepas pendaftaran.

# Kejohanan petanque tawar RM5,400

**SHAH ALAM** - Majlis Perbandaran Kuala Selangor (MPKS) menganjurkan pertandingan petanque remaja pada 11 November di Arena Petanque Kompleks Sukan Kuala Selangor.

Pihak berkuasa tempatan itu memaklumkan Kejohanan Petanque Perseorangan Remaja Tertutup Selangor Piala Yang Dipertua MPKS itu menawarkan hadiah keseluruhan RM5,400.

"Kejohanan terbuka kepada peserta berumur 20 tahun ke bawah bertujuan mencungkil bakat baharu dengan penyertaan terhad kepada 128 peserta lelaki dan 64 bagi kategori wanita.

"Johan setiap kategori akan membawa hadiah RM800, naib johan RM500 manakala tempat ketiga bersama RM300."

## Bantuan Tawas buat 36,000 pelajar

**SHAH ALAM** - Seramai 36,326 ahli Tabung Warisan Anak Selangor (Tawas) yang bakal memasuki darjah satu tahun depan layak menerima manfaat Program Bantuan Masuk Sekolah (PBMS).

Yayasan Warisan Anak Selangor (Yawas) memaklumkan bantuan persekolahan seperti beg, kelengkapan alat tulis, bekas makanan dan tabung dijangka diagih melalui Disember.

"Penerima membabitkan 49 peratus kanak-kanak perempuan dan 51 peratus lelaki. Proses tuntutan bantuan dijangka bermula Disember ini.

"Muat turun aplikasi Yayasan Warisan Anak Selangor – Yawas sekarang dan mendaftar bagi melancarkan proses tuntutan bantuan," katanya di Facebook pada 24 Oktober.

Tawas, antara program kebajikan yang dilancarkan pada 2008, terbuka kepada anak kelahiran Selangor yang memenuhi syarat dan perlu didaftar sebelum anak berusia tiga tahun. Ahli akan menerima RM1,500 apabila berusia 18 tahun.



MAJLIS PERBANDARAN HULU SELANGOR  
JALAN BUKIT KERAJAAN,  
44000 KUALA KUBU BHARU,  
HULU SELANGOR, SELANGOR DARUL EHSAN.  
TEL : 03-6064 1331 FAKS : 03-6064 3991  
[www.mphs.gov.my](http://www.mphs.gov.my)



### NOTIS PEMBERITAHUAN

SEKSYEN 13, AKTA PERANCANGAN BANDAR DAN DESA 1976 [AKTA 172], PEMERIKSAAN TERHADAP

### DRAF RANCANGAN TEMPATAN DAERAH HULU SELANGOR 2035 (PENGUBAHAN 1)

Menurut subseksyen 13 (2) Akta Perancangan Bandar dan Desa 1976 (Akta 172), dengan ini adalah diberitahu bahawa salinan **DRAF RANCANGAN TEMPATAN DAERAH HULU SELANGOR 2035 (PENGUBAHAN 1)** tersebut di atas tersedia untuk diperiksa bermula daripada **24 Oktober 2023 sehingga 24 November 2023**. Bantahan atau cadangan berkenaan Draf Rancangan Tempatan Daerah Hulu Selangor 2035 (Pengubahan 1) di atas boleh dikemukakan dengan menggunakan borang bantahan awam yang disediakan, surat ataupun memorandum sebelum atau pada **24 November 2023** di tempat dan alamat seperti berikut:-

LOKASI PEMERIKSAAN	SERAHAN BORANG BANTAHAN
Lobi Kaunter Bersepadu Majlis Perbandaran Hulu Selangor Kuala Kubu Bharu	Yang Dipertua Majlis Perbandaran Hulu Selangor Jalan Bukit Kerajaan 44000 Kuala Kubu Bharu
PLANMalaysia Selangor Tingkat 16, Bangunan Darul Ehsan Seksyen 14, Shah Alam	
<b>SECARA ATAS TALIAN</b>	
Pautan Dokumen: <a href="https://shorturl.at/cGLRW">https://shorturl.at/cGLRW</a>	Kod QR :

MULAI 24 OKTOBER 2023 SEHINGGA 24 NOVEMBER 2023  
BERMULA 9.00 PAGI SEHINGGA 5.00 PETANG (HARI BEKERJA)

DARIPADA ANDA UNTUK ANDA

## Tambah permohonan permit utiliti

**SHAH ALAM** - Koridor Utiliti Selangor (Kusel) menjangka permohonan permit utiliti negeri meningkat menjelang 2025 seiring Rancangan Selangor Pertama (RS-1).

Pengarah Urusannya Khairul Azmi Misran berkata sebanyak 1,884 permohonan aset utiliti diproses membabitkan telekomunikasi, elektrik dan air setakat 15 Oktober, angka tertinggi di Malaysia.

"Kita jangka peningkatan signifikan beberapa tahun mendatang terutama pada 2025 memandangkan Kusel main peranan strategik dalam

rancangan pembangunan lima tahun negeri.

"Ia meliputi Wilayah Pembangunan Bersepadu Selangor Selatan (IDRISS), Kawasan Pembangunan Pembangunan Sabak Bernam (SABDA) dan Zon Pembangunan Ekonomi Gerbang Maritim Selangor (ZPE-SMG)," katanya pada 25 Oktober.

Beliau berkata persediaan dibuat termasuk membina sistem pangkalan data utiliti bawah tanah untuk memudahkan akses dalam talian di kawasan pembangunan baharu dan sedia ada.

Selain itu, Khairul Azmi berkata pi-

haknya turut menganjurkan bengkel pemurnian proses kerja bersama pihak berkepentingan bagi berkongsi ilmu dan kepakaran.

"Langkah ini diambil sebagai persediaan awal RS-1 dan memanfaatkan ekosistem utiliti di Selangor sekali gus memacu pertumbuhan ekonomi negeri serta menjamin kesejahteraan rakyat," katanya.

Kerajaan Negeri menubuhkan Kusel untuk menjadi pemudah cara kepada syarikat penyedia utiliti memohon permit pembangunan daripada pihak berkuasa tempatan.

### Mudahkan urusan pendakwah

## Sistem digital tauliah mengajar

Oleh SOFIA NASIR

**SHAH ALAM** - Majlis Agama Islam Selangor (Mais) dan Jabatan Agama Islam Selangor (Jais) memperkenal sistem digital pengurusan tauliah mengajar sempena Multaqa Pendakwah Ber-tauliah Negeri Selangor.

Mais memaklumkan pengenalan Perkhidmatan Digital Pengurusan Tauliah Mengajar Selangor itu membuktikan agensi penguatkuasaan agama Islam negeri telus dalam urusan pentauliahan.

"Mais dan Jais mahu menyediakan sistem digital yang mampu menghasilkan kualiti kerja yang lebih efektif dan telus dalam pengurusan tauliah di Selangor.



"Ia memudahkan urusan bakal pendakwah, pendakwah sedia ada dan orang awam membuat urusan berkaitan pentauliahan secara dalam talian berdasarkan kepada modul-modul tersebut," katanya di Facebook.

Sistem digital berkenaan dirasmikan Penggerusi Mais Tan Sri Abdul Aziz Mohd Yusof di Pusat Konvensyen MBSA di sini pada 28 Oktober. Turut hadir Mufti Selangor Dato' Dr Anhar Opir dan Pengarah Jais Dato' Mohd Shahzihan Ahmad.

Lebih 600 pendakwah bertauliah dari seluruh Selangor berhimpun di seminar berkenaan bagi menambah ilmu serta bertukar pandangan.

Program julung kali itu turut mendapat perkenan Duli Yang Maha Mulia Sultan Selangor Sultan Sharafuddin Idris Shah Alhaj, yang menitik berat soal pengurusan tauliah.

## Syukur dapat pencen penakat

**SHAH ALAM** - Suami kepada wanita yang meninggal dunia akibat komplikasi jantung di Seksyen 2 di sini bagaikan tidak percaya apabila menerima faedah pencen penakat dan pengurusan jenazah selepas lebih dua bulan pemergian isterinya.

Norsham Hassan, 45, berkata isterinya Rosmawati Safri, 38, hanya suri rumah dan tiada sumber pendapatan sebelum dikhaskan arwah mencarum Skim Keselamatan Sosial Suri Rumah sejak 1 Disember tahun lepas.

Menurut bapa tiga anak, dia dihubungi Pertubuhan Keselamatan Sosial (Perkeso) dua minggu selepas pemergian arwah yang memintanya mengisi dokumen bagi proses tuntutan faedah terbabit.

Pada awalnya, beliau enggan berbuat demikian kerana menyangka ia jenayah penipuan dalam talian (scammer) sebelum beberapa pegawai Perkeso berkunjung ke rumahnya bagi memberi penjelasan.

"Sepanjang hayat, arwah tidak pernah beritahu dia mencarum Perkeso. Cuma sebelum meninggal, arwah pesan supaya saya guna wang simpanan sebaiknya untuk anak-anak dan saya tidak tahu kata-katanya itu merujuk kepada simpanan ini (pencen penakat).

"Selepas arwah meninggal, Perkeso hubungi saya untuk isi maklumat dan hantar borang tuntutan faedah. Ketika itu saya tidak percaya dan syak 'scammer' sebab setahu saya arwah memang tidak pernah mencarum," katanya.

Serahan faedah pengurusan mayat bernilai RM2,000 berserta kotak makanan prihatin disampaikan Timbalan Pengarah Perkeso Selangor Abdullah Kamal Ahmad di kediamannya pada 24 Oktober.

Melalui skim itu, waris juga menerima faedah pencen penakat RM300 sebulan hingga usia arwah mencapai 55 tahun.



Pemain Gombak FA (kiri) menghalang kemaraan pemain Ingress KL FC dalam perlawanan kelima Liga Juara Selangor di Arena MBSJ, Subang Jaya pada 28 Oktober. Foto Persatuan Bolasepak Selangor

Najmi SFFC, Ingress KL menang bergaya

# Dua pasukan raih tiga mata pertama

Oleh AFIX REDZUAN

**SHAH ALAM** - Tebuan FC Kg Pinang melonjak ke kedudukan kedua kumpulan A selepas membelas KKB Brotherhood FC 3-0 dalam perlawanan kelima Liga Juara Selangor (SCL 2023).

Skuad kendalian Muhsin membuahkan jaringan di Arena MBSJ, Subang Jaya seawal minit keenam menerusi Badri Adnan diikuti dua gol babak kedua oleh Md Shahrul pada minit ke-62 dan Amir Firdaus di penghujung permainan.

Pendahulu kumpulan, Klang Frenz

United FC gagal menjarakkan jurang mata selepas tewas kali pertama 0-1 kepada Ampang Ukay Positive FC hasil jaringan tunggal Mohamed Haikal pada minit ke-43.

Pasukan tercorot kumpulan Ingress KL FC menafikan impian Gombak FA untuk naik ke persada liga dengan kemenangan tipis 1-0 untuk mengutip tiga mata pertama musim ini.

Sementara itu, Sijangkang City FC berjaya merampas kedudukan pendahulu kumpulan B daripada NPNG Damansara Perdana selepas membelas SFC Youth 3-0 pada 29 Oktober.

Penyerang Manaf Mamat muncul wira apabila meledak hatrik pada babak kedua sekali gus membantu pasukannya mengumpul 10 mata.

Skuad bimbingan Micheal Palani, NPNG Damansara Perdana pula di kedudukan kedua, dengan lapan mata dan kekal tanpa kalah selepas terikat 1-1 menentang AAK FC Puncak Alam.

Najmi SFFC Kota Damansara pula melakar kemenangan pertama liga membelas Kajang Northern Merbau FC 4-1 hasil jaringan Ibrahim Suhaib, Muhsin Haikal, Ammar Rasydan dan gol lewat permainan Ermy Syazwan.

## Bangga pencapaian atlet Para Asia

**SHAH ALAM** - Kontingen Sukan Para Asia Hangzhou 2022 mempamer persembahan cemerlang meraih 39 pingat dengan tujuh emas, 15 perak dan 17 gangsa.

Pencapaian itu mele过asi sasaran 35 pingat yang ditetapkan Majlis Paralimpik Malaysia (MPM) dan Majlis Sukan Negara (MSN) untuk kejohanan di China pada 22 hingga 28 Oktober.

Tiga daripada tujuh emas negara disumbang sukan olahraga menerusi Da-

tuk Abdul Latif Romly (lompat jauh lelaki T20), Muhammad Ziyad Zolkefli (lontar peluru lelaki F20) dan Muhammad Ammar Aiman Nor (400m lelaki T20).

Sementara itu, menteri belia dan sukan tetap berbangga dengan pencapaian keseluruhan Malaysia walaupun beberapa nama besar terlepas peluang merangkul emas.

Hannah Yeoh mengakui beberapa atlet yang menjadi sandaran emas negara

kecemasan dengan kegagalan di Hangzhou namun hakikatnya mereka telah mencuba sedaya upaya mengharumkan nama negara pada edisi keempat temasya sukan tersebut.

"Mereka sudah lepas sasaran dibuat bersama MPM (dan MSN), jadi syabas kepada mereka. Kami juga akan kaji semua pencapaian atlet selepas ini," katanya seperti di lapor Bernama pada 28 Oktober.

## Sembilan pemain SFC calon ABK23

**SHAH ALAM** - Sembilan pemain Selangor FC bersama jurulatih Tan Cheng Hoe tersenarai dalam lapan kategori Anugerah Bolasepak Kebangsaan (ABK23) yang berlangsung bulan hadapan.

Samuel Somerville bersaing dalam kategori penjaga gol terbaik diikuti dua pemain pertahanan Quentin Cheng dan Sharul Naizam Zulpakar.

Ketua pasukan Brendan Gan dan Mukhaiyi Ajmal Mahadi bersaing sebagai pemain tengah terbaik. Turut tercalon Faisal Halim (penyerang terbaik) dan Ayron del Valle (import terbaik).

Harith Haiqal Adam Afkar bersaing dalam kategori pemain muda terbaik manakala Aliff Izwan Yuslan calon pemain terbaik Piala MFL.

Cheng Hoe turut bersaing dalam kategori jurulatih terbaik bersama sembilan calon lain.

## Speedy Tigers tumpu kelayakan Olimpik

**SHAH ALAM** - Pasukan hoki lelaki kebangsaan kekal fokus memburu tempat ke Sukan Olimpik Paris 2024 walaupun digugurkan daripada program Road To Gold (RTG).

Pengurusnya Datuk Mirnawan Nawawi berkata keputusan berkenaan menjadi suntikan motivasi untuk berusaha lebih gigih menjelang pusingan kelayakan Januari tahun depan, lapor Berita Harian.

"Kita akan beraksi pada kempen kelayakan Olimpik Januari depan, harap pemain dan pasukan akan memberi fokus dan memberikan yang terbaik untuk layak, selepas itu kita lihat bagaimana. Saya rasa, ini satu motivasi kepada pemain untuk pastikan kita capai misi yang disasarkan bagi menerima lebih banyak bantuan."

"Saya harap pasukan memahami situasi ini dan akan terus berusaha lebih gigih untuk capai sasaran layak ke Olimpik," katanya pada 31 Oktober.

## Latihan khas buat regu negara

**SHAH ALAM** - Satu program latihan khas dirangka buat beregu lelaki nombor satu negara Aaron Chia-Soh Wooi Yik bagi memastikan mereka mencapai kemuncak prestasi di Sukan Olimpik 2024.

Pengarah kejurulatihan Akademi Badminton Malaysia berkata pasangan itu juga perlu berada di kedudukan terbaik sebaik tamat pusingan kelayakan ke Paris pada April tahun depan, lapor Berita Harian.

"Penting untuk Aaron-Wooi Yik menampilkan prestasi yang konsisten dalam kejohanan disertai dan menjaga kedudukan ranking mereka kerana ini akan beri kelebihan buat mereka dari segi kedudukan selaku pemain pilihan," kata Rexy Mainaky pada 29 Oktober.

Selepas mengharungi beberapa kejohanan mereka bakal menyertai saingan Masters Kumamoto di Jepun pada 14 hingga 19 November.

**DR FAHMI NGAH****Seri Setia**

melaowat tapak pasar pagi dan pasar malam Lembah Subang 1, Petaling Jaya

**MARIAM ABDUL RASHID****Meru**

menyertai gotong-royong bersama penduduk Taman Desa Permai 3, Klang

**WONG SIEW KI****Seri Kembangan**

bertemu penduduk Pangaspuri Serdang Raya Court, Subang Jaya

**DATUK JOHAN ABD AZIZ****Dusun Tua**

meninjau keadaan surau yang rosak di Batu 17, Hulu Langat

**LEONG TUCK CHEE****Pandamaran**

bergotong-royong bersama penduduk Pangaspuri Pandamaran, Klang

**CHUA WEI KIAT****Rawang**

menyerahkan sumbangan Deepavali di kawasan DUN beliau

**SYED AHMAD ALHADAD****Lembah Jaya**

merasmikan kejohanan sukan sekolah di kawasan DUN beliau

**S PREAKAS****Kota Kemuning**

menyampaikan baucar Jom Shopping di Taman Sri Muda, Shah Alam

# 700 ceria terima baucar beli-belah

**GOMBAK** - Seramai 700 penerima warga emas dan orang kurang upaya (OKU) menerima baucar beli-belah bernilai RM150 pada program Hari Prihatin Rakyat parlimen Gombak.

Penyelaras program Yayasan Warisan Anak Selangor (Yawas) Mohd Rafiuddin Sarudin berkata pihaknya mengagih 500 baucar Skim Mesra Usia Emas (SMUE) dan 200 baucar Skim Mesra Istimewa (SMIS).

"Baucar bernilai RM150 merupakan hadiah Kerajaan Negeri buat warga emas dan golongan OKU.

**Persediaan hadapi peralihan monsun**

# Gotong-royong bersih saliran

Oleh SITI ROHAIZAH ZAINAL

**SHAH ALAM** - Ahli Dewan Negeri (ADN) Pelabuhan Klang menganjur kempen gotong-royong sebagai persediaan menghadapi peralihan monsun hujung tahun ini.

Azmizam Zaman Huri berkata program bersama masyarakat itu bagi memastikan longkang tidak dipenuhi sampah sekali gus memastikan sistem saliran lancar.

# Perluas program tukar barang terpakai

**SHAH ALAM** - Program 'Trash for Cash' anjuran Pusat Khidmat Masyarakat Dewan Undangan Negeri (DUN) Bukit Gasing diperluas ke Seksyen 6 Petaling Jaya mulai 28 Oktober.

Wakil rakyatnya Rajiv Rishyakaran berkata program itu memberi peluang kepada orang ramai menukar barang kitar semula seperti besi, kertas, plastik dan kaca dengan wang tunai.

Katanya, program yang sebelum ini dilaksanakan di hadapan Pangaspuri Damansara Bistari, Seksyen 19 kini

"Nilai ini telah dinaikkan banding RM100 sebagai hadiah hari jadi sebelum ini untuk menggalakkan mereka membeli-belah di pasar raya terpilih," katanya pada 29 Oktober.

Sementara itu, pekerja swasta Raja Zazlan Raja Shahrin, 46, berkata baucar untuk warga emas meringankan beban penyeriman akibat kenaikan kos hidup.



"Saya mewakili ayah saya Raja Shahrin Raja Ailan tebus baucar, ia dapat digunakan menampung belanja keperluan asas," katanya.

R Mani, 73, (gambar) gembira menerima baucar tersebut yang akan digunakan untuk membeli barang keperluan asas.

"Saya sangat hargai keperihatinan Kerajaan Negeri memberi baucar ini untuk meringankan beban warga emas seperti saya," katanya.

"Perubahan monsun telah bermula dan kawasan Pelabuhan Klang berisiko banjir kilat sekitarnya air pasang. Menjadi tanggungjawab bersama memastikan alam sekitar bersih dan sentiasa galak adakan gotong-royong.

"Jika tidak ambil langkah pembersihan, ia akan mengganggu sistem saliran dan menyebabkan air tidak dapat mengalir," katanya pada 27 Oktober.

Selain itu, pihaknya turut bekerjasama dengan Majlis Perbandaran Klang,

Jabatan Pengairan dan Saliran serta Jabatan Kerja Raya.

"Saya juga telah meminta pihak-pihak terbabit untuk memantau sistem saliran sedia ada dan bersedia sekiranya berlaku kejadian air pasang yang mengakibatkan banjir kilat.

"Antara kawasan yang cepat dinaiki air jika air pasang ialah di Taman Telok Gedong, Pandamaran Jaya dan Kampung Idaman," katanya.

Fasa peralihan monsun daripada Monsun Barat Daya ke Monsun Timur Laut bermula pada 19 September dan berterusan sehingga November.

Rajiv berkata program dengan kerjasama syarikat Trashcycle Malaysia itu mengumpulkan kira-kira 800 kg barang kitar semula pada setiap sesi kutipan.

"Diharap dengan tambahan lokasi ini dapat menggalakkan lebih ramai penduduk membuat pengasingan sampah," katanya.



diperluas ke RT Activity Centre, Seksyen 6 Petaling Jaya.

"Orang ramai boleh menyerahkan barang di lokasi ditetapkan bermula 10 pagi hingga 12 tengah hari pada setiap Sabtu minggu kedua dan keempat setiap bulan."

"Bagi lokasi terbaharu kutipan hanya pada minggu keempat sahaja sepanjang tahun yang bermula 28 Oktober," katanya di Facebook.

# 400 terima Jom Shopping perayaan

**GOMBAK** - Sebanyak 400 baucar Jom Shopping bernilai RM200 diagih di Dewan Undangan Negeri (DUN) Sungai Tua di sini, sempena sambutan Deepavali tidak lama lagi.

Pengerusi Persatuan Kebajikan dan Pembangunan Komuniti India Batu Caves berkata kenaikan nilai baucar berbanding RM100 sebelum ini membuktikan keprihatinan Kerajaan Negeri

terhadap masyarakat India.

"Tahun ini kita berasa kenaikan baucar kepada RM200 berbanding hanya RM100 sebelum ini. Ini bukti kerajaan Selangor prihatin kepada nasib rakyat tanpa mengira kaum."

"Masyarakat India terhutang budi dan berterima kasih kepada Kerajaan Negeri dan kami harap program ini dapat diteruskan setiap tahun," kata B Viskineswaran.

Dato' Menteri Besar Dato' Sri Amirudin Shari menyempurnakan majlis agihan baucar Jom Shopping sempena perayaan Deepavali di Pasaraya Sri Ternak Selayang Baru di sini pada 29 Oktober.

Bermula tahun ini, Kerajaan Negeri menaikkan nilai baucar Jom Shopping kepada RM200 berbanding hanya RM100 sebelum ini berikutan situasi ekonomi dan keperluan rakyat.

# 500 bantuan buat pelajar B40

**SHAH ALAM** - Seramai 500 pelajar daripada keluarga berpendapatan rendah (B40) di Parlimen Bangi berpeluang memohon bantuan persekolahan.

Ahli Parlimennya Syahredzan Johan berkata bantuan sekali bayar RM100 terbuka kepada murid sekolah rendah dan menerang menerusi bit.ly/persekolaanBangi

"Syarat kelayakan lain termasuk dari keluarga B40 dengan pendapatan isi rumah bawah RM4,850 selain ibu bapa merupakan pemastautin dan pengundi di Parlimen Bangi.

"Maksimum hanya dua permohonan daripada satu isi rumah yang sama dengan menyertakan dokumen sokongan berkaitan," katanya di Facebook pada 27 Oktober.

# Pembaikan elak cerun runtuh berulang

**AMPANG JAYA** - Peruntukan khas disalur untuk pembaikan cerun mampu mengelak kejadian tanah runtuh di kawasan titik panas sekitar Ampang, menurut ahli Parlimennya.

Rodziah Ismail berkata kajian Majlis Perbandaran Ampang Jaya (MPAJ) mendapat 118 cerun berisiko perlu penyelenggaraan membabitkan Hulu Kelang, Bukit Antara-bangsa, Pandan dan sebahagian kawasan di Lembah Jaya.

"Semasa diberi mandat jadi ahli Parlimen, saya nampak ada 'loophole' (kelemahan) di peringkat belanjawan tahun lepas kerana tiada bajet penyelenggaraan (cerun). Jadi beberapa kali saya tekankan perkara ini dalam Dewan Rakyat.

"Alhamdulillah, Perdana Menteri Datuk Seri Anwar Ibrahim umum peruntukan RM563 juta bagi tujuan itu di seluruh negara. MPAJ sudah kenal pasti titik panas (cerun berisiko)," katanya baru-baru ini.

# Bersih parit elak banjir kilat

**SHAH ALAM** - Saliran parit beberapa kawasan sekitar Dewan Undangan Negeri (DUN) Balakong giat dibersihkan bagi mengelakkan banjir kilat berikutan hujan lebat kebelakangan ini.

Wakil rakyatnya Ong Chun Wei berkata pembersihan skala besar bersama agensi berkaitan dibuat di lokasi tumpuan yang kerap dilanda musibah itu antaranya Jalan Kasturi dan Sungai Chua.

"Hasil tinjauan saya dapat parit di kawasan ini kebanyakan rekaan lama atau bersaiz kecil. Ditambah timbunan sampah-sarap, ia menyekat aliran air menyebabkan banjir kilat.

"Saya memohon kepada Majlis Perbandaran Kajang dan KDEB Waste Management untuk membuat pembersihan secara berperingkat sementara naik taraf parit dijalankan dalam masa terdekat," katanya pada 26 Oktober.

# selangorkini



Cerpen, puisi & esei

## HADIAH SASTERA SELANGOR 2023

terbit setiap Sabtu dan Ahad di portal [selangorkini.my](http://selangorkini.my)

### Rewang Komuniti di pangsapuri

**SHAH ALAM** - Kerajaan Negeri berhasrat menganjurkan Rewang Komuniti untuk penduduk k pangsapuri kos rendah dan sederhana pada awal tahun depan.

EXCO Perumahan Borhan Aman Shah berkata program tersebut bertujuan menghidupkan kembali semangat gotong-royong dan kerjasama yang semakin berkurangan di bandar.

"Kelompok ini ada semangat kerjasama dan gotong-royong dahulu, tetapi apabila duduk pangsapuri ia semakin hilang. Malah penyakit pun mula datang kerana kehidupan kurang aktif," katanya baru-baru ini.

Borhan menambah Dewan Undangan Negeri Lembah Jaya dan Pandan Indah dipilih sebagai projek perintis bagi menjayakan program dua hari itu.

### Tiket RM3 lawat dua muzium negeri

**SHAH ALAM** - Harga tiket serendah RM3 dikenakan kepada pengunjung Muzium Permainan Tradisional dan Muzium Sejarah Kuala Selangor mulai 1 November.

Menurut Perbadanan Adat Melayu Dan Warisan Negeri Selangor (Padat), harga berkenaan untuk pengunjung tempatan manakala pelancong luar negara RM8.

Tiada bayaran kepada kanak-kanak bawah 12 tahun, warga emas dan orang kurang upaya (OKU).

Golongan sama bagi bukan warganegara RM4. Percuma kepada kanak-kanak bawah berumur 6 tahun.

Muzium Permainan Tradisional di Bukit Malawati dibuka setiap hari mulai 9.30 pagi hingga 5.30 petang pada 14 Februari mempamerkan 44 permainan tradisi dan dikunjungi secara percuma.



#### TANGKAS...

Penjaga gol PDRM FC Aqil Razak (kiri) menghalang percubaan pemain Selangor FC Richmond Ankrah dalam saingan Piala MFL 2023 di Stadium Uitm Shah Alam. Kedua-dua pasukan berkongsi satu mata selepas terikat 1-1. Foto Facebook Selangor FC

Hargai bakat muda bola sepak

## Perkenal dua anugerah baharu

Oleh AFIX REDZUAN

**SHAH ALAM** - Anugerah Bolasepak Kebangsaan 2023 (ABK23) pada bulan hadapan menampilkan dua kategori baharu bagi mengiktiraf pencapaian pemain dan jurulatih dalam Liga Malaysia musim ini.

Liga Bolasepak Malaysia (MFL) memaklumkan dua kategori itu adalah Pemain Terbaik MFL dan Penjaring Terbanyak Piala MFL.

Menurut MFL, pertandingan Piala MFL diadakan julung kali tahun ini membabitkan pasukan-pasukan bawah 23 tahun.

"Musim ini MFL memperkenal Piala

MFL bagi menggantikan Liga Premier serta mengadakan semula pertandingan MFL Challenge Cup yang kali terakhir dianjur pada edisi kedua 2019.

"Kali ini MFL berbesar hati dapat kembali menganjurkan acara berprestij ini (ABK23) secara fizikal yang bakal menyaksikan persaingan lebih menarik dengan kategori baharu," katanya dalam kenyataan pada 31 Oktober.

Katanya, pertambahan itu menjadikan keseluruhan 16 kategori dipertandingkan membabitkan kejohanan Piala Sultan Haji Ahmad Shah, Liga Super, Piala FA, Liga Premier dan Piala Malaysia.

MFL memaklumkan Jawatankuasa Saringan ABK23 menyenaraikan 10

pemain terbaik untuk setiap kategori daripada keseluruhan 398 pemain berdasarkan penampilan bersama kelab.

Sementara itu, Anugerah Pasukan Terbaik diputuskan Ahli Jawatankuasa Teknikal MFL manakala Anugerah Fair Play ditentukan Persatuan Bolasepak Malaysia.

Penyokong juga boleh mengundi pemenang kategori Fan XI dan Gol Terbaik Liga Malaysia 2023 melalui platform SurveyMonkey mulai minggu depan.

Anugerah Pemain Paling Bernilai diberikan kepada salah seorang pemenang empat kategori iaitu Penjaga Gol Terbaik, Pertahanan Terbaik, Pemain Tengah Terbaik dan Penyerang Terbaik.

LIPUTAN MENYELURUH  
**BELANJAWAN SELANGOR 2024**

TARIKH  
10 NOVEMBER 2023 (JUMAAT) | 3 PETANG

MASA



Eksklusif di **LIVE** ► | **SelangorTV** | **MediaSelangor** | **MANA-MANA**